

Avon 50 onns

La historia dallas Pendericulas Sedrun SA

Cun uonn san las Pendericulas festivar il **giubileum da 50 onns**. L'idea d'ina erecziun d'in runal da Dieni a Cuolm Val ei denton naschida gia igl onn 1953 ed igl onn 1960 damonda schizun Pius Maissen da Segnas la lubientscha per l'erecziun d'in runal da Dieni sil Cuolm. Sin iniziativa dalla uniun da cura e traffic decida la radunonza da vischnaunca dils 25 da zercladur 1961 da ponderar l'erecziun d'in runal silla costa da Milez Cuolm ed elegia ina cumissiun preparatorica. Quella entscheiva sia lavur ils 8 da fenadur 1961. Enteifer igl onn 1961 vegn il runal a Valtgeva eregius entras Battesta Soliva e Pieder Deflorin e va en funcziun calonda fevrer 1962.

En original suonda ussa la lavur dalla cumissiun el decuors digl onn 1962 cun schar plidar ils protocols da quella. Ella secumpona dallas suandontas persunas: Christian Berther, Theophil Schmid-Valier, Benedetg Deflorin, Baseli Huonder, Felici Monn, Alfred Decurtins, August Bass, Baseli Monn, Testa Soliva e Victor Berther.

Radunonza dils 3 da schaner 1962 el local da vischnaunca Cadruvi.

Presents ein tut ils tschun commembers dalla suprastonza communal sco era tut ils commembers dalla cumissiun.

Suenter ina clara orientaziun sur dil curriu e passau el ravugl dalla cumissiun preparativa per in runal Dieni – Cuolm Val, entras il president Christian Berther, dat ei ina viva discussiun. In e scadin dils presents s'exprima per l'erecziun d'in runal Dieni - Cuolm Val. In tec da sbatter dat la participaziun dalla vischnaunca. Finalmein seunesch'ins a suandonts conclus che dueien vegnir proponi alla radunonza da vischnaunca dils 7 da schaner 1962:

a) La cumissiun ensemen cun la suprastonza communal propona alla radunonza da vischnaunca da separticipar vid il runal Dieni – Cuolm Val cun silmeins 51 % dil capital d'aczias.

b) La cumissiun propona da terminar la concessiun per 50 onns.

c) Gl'entir capital d'aczias duei sepudend restar en Tujetsch. Ils burgheis e vischins da Tujetsch dueien haver la preferenza enten prender aczias dil runal Dieni – Milez – Cuolm Val.

La radunonza da vischnaunca dils 7 da schaner 1962

Signur president communal Christian Berther, sco president dalla cumissiun da studi per in runal da skis Dieni – Cuolm Val, orientescha detagliadamein sur dalla lavur e preparativas che la cumissiun ha fatg. Tenor siu rapport duei la lingia previda haver ina lunghezia da circa 3 km ed ei seigi previu duas secziuns. Cun ils possessurs da praus seigi en general secunvegniu pervia dalla concessiun. Il cuost total seigi calculaus cun la summa da frs. 860'000.-. Plinavon propona la cumissiun, suenter haver giu contact cun la suprastonza communal, che la vischnaunca duessi separticipar cun 51% dil capital d'aczias. Igl entir capital d'aczias seigi calculaus cun 400'000.- frs., che sereparta sin 2000 aczias a 200.- frs. l'ina. Plinavon recamonda la cumissiun, che sch'ei vegni in di dumandau per lubientscha d'ustria en il raiun dil runal, dueigi quella en emprama lingia vegnir concedida alla societad sezza.

Cun gronda atenziun ed interess ei il rapport da signur president vegnius tedlaus ed ei suonda la discussiun. Signur scolast Theophil Schmid propona d'haver tut quitaun che las aczias stettien en vischnaunca. Signur gerau Fidel Berther propona, sch'ei vegni signau da privats dapli che quei ch'ei drovi, dueigi vegnir repartiun aczias sin tuts interessents. Signur Giachen Martin Valier manegia ch'ins duessi en il sura numnau cass drizzar il capital d'aczias tenor signaziun. Signur Fidel Hendry propona da renconuscher ils burgheis ch'ei buca domiciliai en vischnaunca cun la taxa d'ascensiun sco ils indigens. Signur mistral Vigeli Berther ch'ha er aunc interess da quella interpresa fa la proposta, che la vischnaunca dueigi separticipar cun silmeins 51% dallas aczias.

Suenter la discussiun vegn priu sequent conclus:

- 1. La vischnaunca dueigi separticipar cun silmeins 51 % dallas aczias.**
- 2. Dar la concessiun alla societad acziunara per runal Dieni – Milez – Cuolm Val per 30 onns.**

En num dalla cumissiun engrazia signur president alla radunonza da vischnaunca per la confidanza, ch'els hagian gudiu tier quella lavur e declara che la missiun dalla cumissiun seigi ussa alla fin. La radunonza da vischnaunca pren encunter quella demissiun en il sura senn, mo tuorna ad eleger l'entira cumissiun sco ella ei stada, per las preparativas, sut num dalla societad acziunara runal Dieni – Milez – Cuolm Val.

Per fei dil sura
Gion Chrisost Caduff

La pressa romontscha annunzia:

Runal Dieni – Milez - Cuolm-Val

En sia radunonza dils 7 d.q. ha la vischnaunca da Tujetsch concludiu unanimamein da baghegiar in runal da Dieni a Milez e Cuolm-Val. La vischnaunca separticipescha vid la societad, che vegn fundada proximamein cun 51% dallas aczias. Las preparativas ein gia avanzadas aschilunsch, ch'ins quenta metter en funcziun quei runal gia per la stagiun d'unviern 1962/63. Nus engraziein e gratulein cordialmein alla vischnaunca da Tujetsch per quei conclus. Entras il runal Dieni – Milez - Cuolm Val arvein nus als skiturs in dils pli bials territoris da skis lunsch entuorn. (Com.)

Gasetta Romontscha

Il cudisch da protocols dalla cumissiun noda aunc quei di il suandont:

Radunonza dils 7 da schaner 1962

La decisiun ei dada. La radunonza da vischnaunca partenent il runal Dieni – Cuolm Val ha giu liug en casa da scola Sontget gia ils 7 da schaner 1962 enstagl dils 13 da schaner. Il conclus ei staus clars scol tarlischont sulegl tuatschin. Unanimamein han ins decidiu da dar la concessiun pil runal Dieni – Cuolm Val e da separticipar vid quella fatschenta cun silmeins 51 % dallas aczias. Ins ha era acceptau la proposta dalla cumissiun partenent la participaziun dil pievel tuatschin al capital d'aczias. Per la fundaziun definitiva dalla societad acziunara d'in runal Dieni – Cuolm Val vegnan eligi ils diesch commembers dalla cumissiun preparatorica (comite d'iniziativa). Ussa frestgamein vinavon!

Seduta dalla cumissiun dils 7 da schaner 1962 ella Pensiun Soliva, Sedrun

Gl'ei la davosa radunonza dalla cumissiun preparatorica pil runal Dieni – Cuolm Val. Oz secumpona la cumissiun per la fundaziun dil runal.

Quella cumissiun ha la missiun da far l'emissiun dallas aczias, da preparar la reclama, la finanziaziun sco da far preparaziuns per la fundaziun. Ella ha plinavon da studegiar aunc inaga manedlamein las offertas, d'inspectar tals indrezs da runals e da surdar las lavurs.

Ins parta si la cumissiun en duas gruppas :

Gruppa administrativa : Christian Berther, president; Theophil Schmid-Valier, Benedetg Deflorin, Baseli Huonder e Felici Monn. Gruppa tecnica: Alfred Decurtins, president; Victor Berther, August Bass, Baseli Monn e Battesta Soliva.

Alla gruppa administrativa vegn adossau la lavur da reclama, da finanziaziun, dall'emissiun dallas aczias sco tuttas autras caussas administrativas.

La gruppa tecnica ha la missiun d'acquistar il necessari terren pils edifecis dil runal, da studegiar la lingia precisa dil runal, da segirar il dretg da transit tras praus e tras pastiras. Ella duei era studegiar las pusseivladads da parcar autos a Dieni spel stradun cantunal.

Plinavon duei ella prender investa da runals en autras cuntradas per survegnir in clar maletg d'in u l'auter sistem avon la surdada definitiva. Ella duei preparar concisas propostas per mauns dall'entira cumissiun, ch'ha allura da surdar las lavurs.

Cun la hodierna radunonza ei la missiun dil sutsignau actuar alla fin. El vegn remplazzaus d'in representant dadens il Dutg Gron, da signur Victor Berther, Rueras. El ei pli damaneivel dil runal viers Cuolm Val e sa registrar meglier tgei che succeda leuen. Il sutsignau vegn eligius sco cassier da quei comite.

La lavur ella cumissiun preparativa pil runal Dieni – Cuolm Val ei stada penetrada da grond ideal e d'in bien spért. Possi quei bien spért seplantar vi sin la nova societad da runal Dieni – Milez – Cuolm Val. Buna ventira al pop, ch'ei aunc buca battegiaus.
Sedrun, ils 7 da schaner 1962
Schmid-Valier Theophil, actuar

Protocol dils 29 da schaner 1962 en Pensiun Soliva a Sedrun a l'ina dil di.

Presents ein tuts ils commembers dalla cumissiun en corpore. Signur president Christian Berther, ch'ha envidau ils presents entras carta, beneventa ils presents, fagend attents ch'el quanti en quella sesiun esser aschilunsch ch'ins sappi sedecider a tgi surdar las lavurs per ils mecanissem dil runal. Ei seigi envidau dus dils pli impurtonts construiders per la hodierna sesiun. Signur Garaventa ussa e signur Städeli sin questa sera per orientar vocalme in sur dalla part tecnica, mintgin da siu project. En connex cun quella missiun, la quala ei per igl avegnir da gronda impurtonza pil reussir dil runal, vegn signur Alfred Decurtins, sco president dalla subcumissiun part tecnica, envidaus da rapportar da sia lavur.

Alfred Decurtins rapporta:

1. Appartenet lavur per segirar praus e transit
2. Orientaziun da diversas conferenzas cun construiders da runals
3. Rapport dallas impressiuns dils differents runals visitai a Bregenz, Flums e Hospental.

Victor Berther ch'ha protocolau las conferenzas en detagl, ha la missiun da preleger quellas. La lavur fatga dalla cumissiun pintga ei scretta en siat differents protocols. La prelecziun da quels absorbescha dabia temps.

•••

**Protocols dalla cumissiun pintga dil runal Dieni – Cuolm Val; part tecnica
Radunonza dils 7 da schaner 1962 en local Pensiun Soliva**

Ils 7 da schaner 1962 immediat suenter ina sesiun dalla cumissiun gronda da runals ein ils commembers seradunai el local dasperas e liquidau las suandontas tractandas e seconstitui sco suonda:

1. Sco president dalla cumissiun pintga vegn eligius unanimame in signur Alfred Decurtins, actuar Victor Berther, ulteriurs commembers: signur Baseli Monn, signur August Bass e signur Battesta Soliva.
2. vegn anflau per necessari d'immediat segirar ils praus per transit e sulom.
3. Suenter liunga discussiun vegn signur Baseli Monn incaricaus da segirar il funs, cumpletar ils existents contracts cun prezi tenor proposta da signur Brändle:
 - per ira atras cun conduct: prau magher 0.30 per meter
prau grass 0.50 per meter
 - sulom per sochels: prau magher 30.- frs. per mast
prau grass 50.- frs. per mast

Ulteriurs suloms seigien da francar, resalvar l'entelgientscha dalla cumissiun gronda da runals.

4. Vegn concludiu da far ina viseta oculara dils runals sistem Garaventa mardis proxim, ils 19 d.q. e d'envidar en ils auters interessents per viseta tochen ils 16 d.q.

Cun quei ei stau finiu

Victor Berther

Protocol dils 15 da schaner 1962 el Kreuzlipass, conferenza cun signur Brändle
Presents: Signur Brändle, Meilen, dalla cumissiun: Alfred Decurtins, Gion Battesta Soliva, August Bass, Baseli Monn e Victor Berther.

Allas uras fixadas, circa allas duas da s.m., arva president Alfred Decurtins la sesiun, fagend beinvegni als presents e surdat il plaid agl inschigner signur Brändle.

Duront circa 2 – 3 uras va el atras punct per punct sia offerta, orientescha sur da scadin fatg tecnic e rispunda allas damondas fatgas cun perschasiun excelenta. Igl ei quella construziun che svariescha dallas autras offerats cun ils paucs masts. El argumentescha quei sco suonda: pli paucs masts e pli pign manteniment.

El segirescha el medem prezi d'offerta supplementara dus masts per secziun gratis; 2 ½ %

sin l'entira summa; per surpli pagament 3 ½ % tscheins.

Furniziun; empustar ils 15 da fevrer e furniziun finida sigl 1. da december.

El haveva cun el in per tocs, dils quals havein priu investa e stai incantai, ton dil material, sco dalla tecnica. Suenter ch'el ei staus absents havein telefonau en in per loghens.

Resultat: Pontresina: buca cuntents

Celerina: buca tenu en temps da furniziun

Hospental: fetg cuntents

Suenter che la cumissiun ei stada persula, orientescha signur Decurtins sur dalla viseta dil runal Garaventa. Tal runal hagi fatg sin tuts buna impressiun.

Cun caschun da quella conclusiun dalla sesiun vegn communicau radunonza per ils proxims dis per representant Oehler.

Finiu circa allas sis.

Per fatg dil sura

Victor Berther

Conferenza dils 16 da schaner 1962 el Kreuzlipass

Presents per Oehler signur Schärre e signur Rüttimann, cumissiun pintga completa.

Signur Schärre orientescha sur siu project. La differenza gronda ei ch'el baghegia cun masts fuorma T. Tenor siu project peisa gl'entir project circa 83 tonnas. In motor spezial vegness cun supplement 44'000.- frs. Montascha pauschal quintau supplement circa 17'000.- frs.

Profil e prender si project definitiv sin quen dalla societad. La firma fuss prompta da controllar. Garanzia dessen els duas sesiuns. Era signur Schärre ha differenta tocca cun el ed ins sa seperschader ch'el muossa rauba che meretta en scadin cass nossa atenziun e renconuschientscha.

Suenter ina discurrida da circa 3 uras sabsentan ils dus signurs dalla cumissiun, laschond anavos fetg buna impressiun, ton dil project sco dalla firma Oehler. Signur Schärre recamonda da prender investa da ses runals a Flumserberg, che seigien dapi 3 onns en funcziun.

Per fatg dil sura

Victor Berther

18 da schaner 1962 - investa da 5-6 differents runals sil Flumserberg

Per ils 18 da schaner essan vegni envidai dalla firma Städeli dad Oetwil a Flumserberg per visitar siu sistem da runals fatgs 1959 e 1961. Ad uras essan sentupai a Flums cun signur Städeli, il qual serenda cun nus immediat sigl ault. Nossa emprema viseta fagein nus cun el a sia concorrenza sistem Oehler. Duront ch'ina part dalla cumissiun s'orientescha sur digl indrez cun far diever dil runal, ei l'autra part dalla cumissiun alla staziun primara per s'orientar digl indrez e menaschi. Controllau e visitau cundrez da motor da sependar vid suga, da fermar vid suga rollas e gummis, battarias da rollas e cundrez da drizzar spertadad etc. Il davos sistem ei in cundrez ch'ha fatg gronda impressiun, havend la pusseivladad da drizzar il tempo dalla suga da 1 – 4 km per ura tenor basegns senza sclauder gl'entir indrez e perquei in avantatg immens enten duvrrar spargnusamein forza electrica.

Sia fermezia visavi la concorrenza seigi negins incaps tecnicos e bien arranschament da far pista. Els hagian gronda frequenza e negins incaps, mondien spert e cun minimas spesas dil runal alla sutgera e recamondien la firma Oehler.

Cun signur Städeli mein vinavon tier siu sistem e visitein gl'emprema la staziun a val, la quala vegn da signur Städeli explicada en detagl. Suenter ina inspecziun generala e gentar, ascendin nus il secund runal, respectiv sutgera sistem Müller ed ascendin sin in ault. Da retuorn ella casa hospitonta, davos meisa, discurren dil viu e dil cuntenschiu resultat, dumandond sclariment en detagls. Da quels lessen francar ils suandonts.

Arvers dubels seigien per runals megliers e pli recumandai era per sugas cumbinadas (runal-sutgera). Project e miserar ora mondi tut sin siu quen. Masts vegnien furni cun in pign surpli galvanisai. Suga da transport vegni messa a disposiziun dall'entschatta e fatg da Städeli per 6'100.- frs. e quintau tscheins per far diever 600.- frs. per meins. Furniu a temps vegn segirau. Bardegliaziun da pilotadi: Ward-Leonard Steuerung «Oehler» seigi cara e complicada, denton baghegia el era sin giavisch. Fundament per postaments circa 6 m³. Masts 15+13, total 28 tocs. Supplement, respectiv meins prezi, circa 3000.- frs. per mast e

circa 3000.- frs. per batteria da rollas. Garanzia vegn dau 2 sesiuns.

Ei era gia avanzau il temp e nus sespartin da signur Städeli engraziand per sia curtesia, bunaveglia per sias explicaziuns ed orientaziun.

Sin via a casa havein giu peda da discussionar alla liunga sur dil viu e sur dalla differenza d'in e l'auter sistem e dils avantatgs dils differents construiders ton tecnic sco economic.

Perschuadi essan denton che nossa responsablada ei buca pintga.

Per fatg dil sura

Victor Berther

Sesiun 23 da schaner 1962 tier Soliva Battesta

Presents la cumissiun pintga en corpore. President Alfred Decurtins beneventa ils collegas dil runal ed havess bugen sch'ils presents savessen seunir sin silpli bia 2 – 3 dils concurrents per il runader Dieni – Cuolm Val. Dapi nossa viseta a Flumserberg ha el gia giu differenta corrispondenza e telefons cun ils respectivs interessents sorprendiders. Ina corrispondenza en ina gasetta dalla Svizra Centrala lauda in niev runader che la firma Städeli ha construiu en tuts risguards. Era ils presents ston constatar suenter la viseta a Flums, che Städeli baghegia runaders endretg en scadin risguard ed ei tuttavia era favoreivels, havend el cumpriu en sia offerta bia lavur e material ch'auters vulan esser pagai supplementar.

Per haver pli buna survesta dallas offertas vegn da cuminonza tratg ord las offertas avon maun ils principals datums e lura paregliau.

L'offerta Brändle ruchegia alla periferia, perquei ch'el sez dat sura tut la lavur ad auters ed ei divers dubis. L'offerta Bachmann schein curdar, perquei che nus havein giu negin cuntact cun tal. L'offerta Oehler essan perschuadi che fuss tecnicamein la pli avantagiusa, denton ha Oehler aschi bia extras e supplements che nus stuein, schegie mo nuidis, s'abstrahar da cuntinuar a contrahar cun quella firma.

La firma Garaventa ei finanziamein favoreivla ed era la tecnica che quella firma applichescha vid ses indrezs ei approbala e renconuschida, mo displai il mecanissem che vegn construiu ell'Austria. Suenter che nus havein giu paregliau las quater offertas las pli adattadas, essan da cuminonza perina da, num midadas extraordinarias, star en per firma Städeli e Garaventa. La firma Brändle lessan nus aber tuttina aunc dar suatientscha a sia invitaziun e mirar il runader a Hospental. Perquei ein eligi Victor Berther, Baseli Monn ed August Bass per ira sonda proxima e suenter dar rapport dalla part tecnica da quei sistem.

Signur Alfred Decurtins ha notificau tier ils detagls da scadin sorprendider las caussas buca claras e vul schar sclarir giu quels detagls u en scret ni per telefon ils proxims dis.

Per fatg dil sura

Victor Berther

27 da schaner 1962 investa runal Brändle Hospental

Enstagl da Baseli Monn ch'ei impediud, visetan Alfred Decurtins, August Bass e Victor Berther il runal Brändle a Hospental. Retschards alla staziun Andermatt da signur sergent Venzin, essan serendi da cuminonza tier la staziun dil runal sper il vitg. Cun veseivel interess ha signur Venzin ed il maschinist orientau nus sur gl'entir indrez e menaschi, demonstreu la cumbinaziun digl indrez Ward-Leonard sistem ch'ei a paregl cun il principi da firma Oehrli a Flums. Havein inspectau il cundrez da fermar murdetscha vid la suga e las rollas. Daniev ei per nus gl'indrez ch'ei tschentaus giun plaun e vegn stendius entras la peisa sin il fundament, enstagl dils indrezs visitai entochen ussa, fermi e drizzai da stender suren. En scadin grau essan perschuadi ch'era sistem Brändle funcziunescha en uorden e quei vegn da signur Venzin e signur Moteli era segirau. Omisdus ein incantai dalla firma Brändle e recamondan ella, havend els giu mo las meglieras exprienzas ed emperneivlas relaziuns cun numnada firma. Ils quens seigien buca variaii dall'offerta fatga per la minima caussa.

Suenter l'investa dil runal essan serendi en casa Venzin ed el dat detagliadamein aunc orientaziun dil menaschi.

Transportau 1961	51'805 personas,
Tratg en hagian total	46'400.- frs.
Total cuosts menaschi	12'400.- frs.
Per persunal hagian pagau	12'453.- frs.
Rest schuber	22'411.- frs.

Appliccau il recav schuber 50% spesas dil baghegiar; 3% quen da menaschi, 47% quen da fundaziun.

Engraziand per la hospitalitad gudida essan serendi ad Andermatt, nua che nus essan casualmein fruntai cun signur Städeli e puspei discussionau detschartamein las variantas dalla concorrenza. Ditg e liung havein senza far a signur Städeli illusiun paregliau ils benefecis d'in principi e l'auter e d'ina pusseivladad e l'otra. Appartenent quei sistem da schar funcziunar il menschi senza scoleur perschuada el nus ch'ei seigi mo luxus. Nus stuessan quintar per nossas secziuns cun in supplement da 88'000.- frs. El pareglia cun igl automobil carrabel senza bardegliaziun (Kupplung). Luxus. Signur Russi ch'ei presents ha giu priu investa dad in novissim runal en la Surselva Turitgesa, sa buca ludar avunda il cundrez Städeli ed el hagi envidau quei construíder per schar prender investa d'in niev project enta Realp, nua ch'ei vulan serender ual suenten nossa discurrída ed ei la raschun che signur Städeli cun sia regenza ein presents ad Ursera.

Cun fetg buna impressiun da signur Städeli, denton senza schar encorscher simpatia per el, essan i dapart e disputau sin via sur il Cuolm Ursera da nossa viseta e missiun.

Per fatg dalla conferenza

Victor Berther

•••

Ins ei generalmein orientai sur la lavur e dall'idea dalla cumissiun pintga. Aspramein vegn ei aunc discussionau in per detagls e lura astga signur Garaventa cun siu substitut separticipar alla sesiun. Beneventai dil president, engrazia signur Garaventa ch'el astgi prender part dalla radunonza ed el seigi prompts da dar scadin giavischeivel sclariment. Medemamein siu representant, signur Sattler, ei leds d'astgar orientar da tuts detagls.

I. Supplements da pagaglias seigi cumpriu ell'offerta.

II. Supplements per survigilonza detti negins.

III. Cumbinaziun runal-sutgera seigi pusseivla. Meini denton alla liunga e seigi buca cumpriu. Fetg liung temps per survegnir concessiun federala. Ins sappi preveder la pusseivladad.

IV. Garanzia dettien els normal in onn.

V. La taglia d'esit seigi cumprida ell'offerta

VI. Il montadi ei offerius separaus.

VII. La suga accessoric stetti a disposiziun e cuosti pauschal montada plus demontadi 12'000.- frs.

IX. Il serius studi laschi far neginas sminuaziuns d'offerta, ei detti denton era negins supplements.

X. Il temps da furniziun sappi la firma segirar sigl 1.12.1962, aschilunsch sco l'empustaziun vegni fatga ad uras.

XI. Il galvanisar ils masts vegniessi in supplement da circa 50 raps per kilo (il mast ei circa 1000 kg).

XII. Detti meins masts che projectau mondi anavos circa 1.80 per kilo mast fatg.

XIII. Els sappien surprender la garanzia ch'ei sappien remplazzar material defect, retratgs ord l'Austria, en cass da disturbis internaziunals, grazia a sia gronda provisiun e lizenza da fabricaziun.

XIV. Motors seigien calculai il minimal per buca engraviar la societad cun expensas buca necessarias per energia electrica, denton prestien ils motors prevedi segiramein sufficient, era tier il pli ferm diever dil runal.

XV. Il cundrez da sepender tili mo successivamein e seigi offerius.

XVI. La bardegliaziun System Ward-Leonard vegn buca recumandada.

XVII. Siu sistem hagi mo ina spertadad.

Signur Garaventa engrazia ch'el ha astgau orientar e fuss leds sche sias breigias e lavur vegnessien renconuschidas entras surdar ad el la confidonza d'erreger il runal. Per conclusiun muossa el aunc in film da differentas sugas e loghens en construcziun. Fixond cuntinuaziun dalla sesiun sin las otg dalla sera a Rueras ella Pensiu Badus ed engraziand a tuts per la participaziun, siara president Christian Berther la sesida.

Cuntinuaziun allas otg dalla sera tier signur August Bass a Rueras.

Presents tuts diesch commembers dalla cumissiun e signur Städeli dad Oetwil. Christian Berther fa beinvegni e beneventa signur Städeli, il qual engrazia per l'invitaziun ed havend el gia giu cuntact cun il president dalla cumissiun tecnica, Alfred Decurtins, dat el il plaid a lez per schar far las damondas aunc buca claras e per orientar ils ulteriurs commembers dalla cumissiun. Signur Alfred Decurtins ed ils ulteriurs commembers laian orientar da siu project da tuttas varts:

1. El furneschi sigl 1. da december en funcziun il runal ni surprondi castitg convenziunal.
2. El laschi curdar ils 5% rabat e furneschi las staziuns a Val en fier (meins relasch circa 27'000.- frs. surprondi cuosts da circa 30'000.- frs.)
3. Per galvanisar ils masts detti in supplement da 310.- frs. per toc.
4. Supplement da carischia seigien gia offeri.
5. El paghi ils luvriers e gidonters che nus stuessien metter sez.
6. El surpren l'entira survegionza.
7. Taglia d'esit seigi cumprida.
8. Garanzia per treis sesiuns.
9. La suga accessoricca da transport per frs. 6000.-

Havend signur Städeli rispundiu a tuttas damondas, engrazia el als presents e s'allontanescha, spetgond novas favoreivlas e dend la bunanotg.

Per buca vegnir aunc pli fetg en difficultads a tgi surdar, vegn s'abstrahau d'aunc schar vegnir signur Brändle da Meilen che havess segiramein era in sistem perfetg, sco ins sa relatar suenter la viseta a Hospental. Discussionond aviartamein sur las experienzas ed impressiuns fatgas el decuors dil suentermiezdi e sera, vegnan ins unanimamein perina da scrutinar a tgi surdar il project.

Ils dumbravuschs Baseli Huonder e Theophil Schmid arvan il scrutini e president Christian ofniescha tal.

Garaventa obtegn 2 vuschs

Städeli Oetwil obtegn 8 vuschs

Cun quei ha quei delicat pensum priu sia conclusun arvend las portas per outra gronda lavur. Signur Städeli ch'ei en quei interval gia a Sedrun vegn per telefon puspei clamaus anavos. La radunonza va vinavon ed ins dat sura a president Christian Berther, August Bass e Victor Berther da s'interessar sur da prau e plaz per parcar autos a Dieni.

Signur Baseli Monn orientescha sur las differenzas appartenent passadi e suloms ed ei seigi da contrahar cun aunc quater possessurs. President Christian Berther pren per notizia e vul semetter en cuntact cun quels signurs.

Christian Berther, che ha gia giu ina conferenza cun representants dalla banca cantunala, recamonda da schar far la vischnaunca igl emprest, essend che lezza paghi mo 3 ½ % tscheins visavi la societad acziunara che stuessi pagar 4 ½ % tscheins. Secapescha che tuts ein cuntents e signur Theophil Schmid, sco cassier, dueigi ensemen cun president Christian Berther, menar vinavon quella caussa.

Dapli vegn Victor Berther incaricaus da cumprar in cudisch da protocols. Suenter entgina discussiun vegnan ins perina da battegiar il runal cul num:

Runal de skis SA Sedrun-Milez

Skilifte AG Sedrun-Milez

A signur Städeli ch'ei denton anflaus a Sedrun ed ei ussa arrivaus, fa signur president Christian Berther aunc duas damondas appartenent sia offerta.

1. Sch'el surprondi lura sez da pagar ils luvriers gidonters ch'el ha giavischau tenor offerta che la societad paghi.
2. Sch'el baghegi era en siu project ina segironza automatica sco Garaventa hagi en siu runal a Sedrun senza supplement.

Signur Städeli rispunda ch'el vegli era vegnir encunter en quels dus puncts e corrispunda als giavischs.

Ussa vegn signur Städeli orientaus che la lavur seigi surdada ad el e Städeli engrazia

commuentaus dalla confidonza cordialmein, segirescha da far buna e cuntenteivla lavur. El ha denton il giavisch ch'ils commembers dalla cumissiun tecnica restien durent gl'entir temps da baghegiar en funcziun ed ad el a disposiziun.

Signur Städeli vegn entras tscherna eligius sco cussegiader ella cumissiun dil runal Sedrun-Milez SA.

Sco marena da batten offerescha signur Städeli plattas carn ed in per butteglias vin.

Concludend la sesiun cun la finiziun dalla marena, serendin nus a casa circa in'ura suenter mesanotg cun bien humor e cuntents dalla lavur fatga.

Per fei dil sura il protocolist

Victor Berther

Radunonza dils 8 da fevrer 1962 el hotel Oberalp a Sedrun all'ina da miezdi

Invitaziun entras carta da president communal. Presents: la cumissiun dil runal cun excepziun da signur Felici Monn che selai perstgisar e Baseli Monn ch'ei malsauns.

Signur Christian Berther beneventa ils presents ed orientescha cuort sur las tractandas.

Signur Städeli engrazia entras brev per la surdada dalla lavur e confidonza ed atesta a scret las concessiuns ch'el ha giu fatg vocalmein. Sin las damondas ch'el fa entras brev vegn concludiu.

1. Entras tscherna vegn concludiu da schar galvanisar la construcziun da fier.

2. La staziun da cuolm concludin da far en betun, sereferond sin sia purschida, ch'el metti il fier per il betun ed alla firma da tratsch e betun il lenn, respectiv la fuorma a disposiziun.

3. Vegn supplicau da schar far offertas per las staziuns a val en fier ni en betun en omisduas variantas per saver sedecider per il cunvegnent.

Signur Alfred Decurtins ha da rispunder quella brev da signur Städeli conform ils conclus.

President Christian Berther orientescha sur il contact ch'el ha priu cun possessurs da prau. A hagi detg da dar sut cundiziun che sch'il bi vegni surbaghegius, stoppi la societad prender gl'entir toc. B seigi en uorden. C e D hagian dau lubientscha dad ira atras, seigien denton buca cuntents cun la purschida ed ei seigi aunc da secunvegnir. Denter la cumissiun ein ins dil meini ch'ei seigi da pagar, sche zaco pusseivel e tuts il medem prezi, eventualmein duvrar igl argument ch'ins sappi e stoppi untgir dalla stagiada.

Ella suandonta orientaziun fa president Christian Berther enconuscent ch'el, signur Bass e Victor Berther, hagian priu investa dil plaz da parcar. Ideals fussi il prau dadens claus da nuorsas, che vegni denton custeivels d'emplenir si uliv il stradun. Ei seigi cunvegnent da tschintschar cul possessur per segirar el, cu el fuss ulivaus. Per uonn denton quintassen ch'il plaz sut casa e dadens casa da Baseli Berther fussi sufficientes ed ins less veser il svilup avon che far memia gronds cuosts. Cun Vigeli Berther, Dieni, vegn tschintschau ed era quintau che lez sorprendess da far il plaz per pagament.

Appartenent il transitar ed erecziun dil runal sin terren dalla vischnaunca ein ins dil meini ch'ei s'audi medemamein da pagar ils suloms e lubientscha da stender suga. Signur president vegn incaricaus da metter avon alla suprastonza communal per schar far pretensiuns, sche pusseivel numnar ina summa pauschala.

Resumond las aczias annunziadas san ins constatar ch'il capital seigi gia signaus sur il quorum stipulaus. Signau provisoricamein ein tochen oz 202'200.- frs. en 1011 aczias. Ei vegn schau signar era jasters tochen 1000.- frs. suenter ch'il termin fixaus per indigens ei spiraus.

A signur Theophil Schmid vegn dau sura da studiar il text per formulars da signar aczias e retrer offertas per tals stampats. Per saver sch'ei cunvegna, ni sch'ins stoppi alzar il capital d'aczias, lessen bugen saver co signur Battesta Soliva, ch'ha siu runal dapi igl 1. da fevrer en funcziun, patratgi dalla fusiun. Battesta Soliva dat giu ina clara orientaziun, co el patratgi dalla fusiun. Essend ch'il protocol da concessiun plaida empau auter che quei ch'ins quintava eis el obligaus da fusionar, mo sch'il gia existent runal e sutgera s'euneschan. En interess dil general eis el per ina fusiun, vul denton saver las cundiziuns. Signur Christian Berther vegn incaricaus da semetter en contact pli serius cun la sutgera Cungieri e societad runal Calmut e tschentiar in ultimatum per survegnir risposta. Era a signur Battesta Soliva vegn dau 15 dis temps da ponderaziun.

Durent la discussiun offerescha signur Theophil Schmid diesch aczias dalla firma Murer SA

per 150.- frs. l'ina e president Christian Berther resalva ellas per la societad Sedrun-Milez cun la resalva ch'ins seigi cuntents.

Suenter empau discussiun e raschunada, siara president Christian Berther la sesiun engraziand per la pazienza e cun la speranza ch'il tema «fusiun» selaschi lugar a buna fei.

Gl'actuar

Victor Berther

Protocol dils 29 da mars en Pensiun Soliva a Sedrun

Entras carta d'invitaziun ei la sesiun vegnida convocada sin las 13:30 uras tier Battesta Soliva. Presents ein tuts diesch commembers dil comite runal.

Beneventond ils commembers, arva president Christian Berther la radunonza cun schar leger ils davos protocols.

Gl'actuar Victor Berther prelegia ils treis protocols dalla sesiuns dils 7 da schaner, dils 29 da schaner e tal dils 8 da fevrer, ils quals vegnan senza oposiziun approbai.

Il president orientescha sur dil contract prius appartenent prau a Putnengia sper via per far in adattau plaz per parcar. Il possessur vendess pli bugen il frust che mo metter a disposiziun. Baseli Monn ch'ha sez avon maun in project en proxima vischinonza fuss eventualmein prompts da cumprar ed ulivar il toc ed el metess il plaz a disposiziun alla societad per temps d'unviern e quei vegn da tuts approbau. Dalla discussiun vegn fatg diever da tuts commembers presents ed ei croda divers meinis e propostas e mo il meini da buca cumprar giu terren sin cuost dalla societad ei unanims. Alla fin finala vegnan ins perina da spetgar entochen ch'ei seigi terren e surveser la situaziun e signur Benedetg Deflorin vegn incaricaus da seconferir cun famiglia Berther Dieni appartenent tener aviert plaz da parcar sut sia casa, dadens sia casa e da l'autra vart dalla punt il claus da nuorsas e francar quei entras tscheins, circa 100.- frs. per tschavera.

Secunda orientaziun appartegn la damonda da dar aua per basegns higienics alla staziun a val dil runal. Baseli Monn ch'ha sez giu fatg la damonda tier la corporaziun Aquaduct aua S.Gions per interess privats ed era survegniu la concessiun sut certas cundiziuns, fuss prompts da schar separticipar la societad dil runal. El sez hagi giu dumandau signur Duri Vigeli Cavegn da Rueras per aua a Sudada, denton seigi la risposta negativa. Ei leva si el ravugl dils presents il dubi, schebein il runal fussi survius cun l'aua dalla corporaziun Fontauna S.Gions pervia dall'altezia. Nuota tonmeins vegnan ins tuttina sil meini da far ina tala damonda tier la suprastonza digl aquaduct.

Tiarza orientaziun: Signur Städeli ha giu tarmess al departement da baghegiar il project e dumandau la lubientscha cantunala per il runal Sedrun-Milez-Cuolm Val. La risposta dils 15 da mars a signur Städeli cun copia al president ei buca curdada ora tenor giavisch e signur Städeli ha rispundiu tal scriver ils 28 da mars e pretendiu las ordinaziuns cantunalas e pretensiuns spezialas. La risposta ei aunc buca avon maun.

Quarta orientaziun: President Christian Berther communicescha ch'ils projects d'emissiun seigien ussa avon maun e medemamein ils attests per schar signar definitivamein las aczias. Generalmein van ins d'accord cun il meini da schar parter ora immediatamein ils attests e rimnar tals per saver sch'ins sappi aunc dar caschun ad jasters interessents da schar signar aczias. Il capital d'aczias seigi buca da survargar 450'000.- frs. Cun ils attestats seigi era d'admetter in schec postal sin il qual ins sappi e stoppi pagar en senza spesas las aczias anunziadas entras attest.

La quinta orientaziun appartegn il credit che la banca hagi empermess. 1a part ein las aczias, 2a hipoteca da 300'000.- frs. sin fundament dalla cumpra dil runal Valtgeva ed il tierz emprast encunter segironza dalla ludeivla vischnaunca. Quella orientaziun ei approbada senza discussiun. Ei vegn denton recumandau ord il miez alla cumissiun administrativa da preparar las statutas e da rimnar statuts d'autras societads da semegliont character ed eventualmein trer tier ina persuna ufficala legala sco cussegliader.

La sisavla e la pli interessanta orientaziun appartegn fusiun culla sutgera e runals existents tenor protocol anteriur. La prelecziun dalla risposta dil runal Oberalp-Calmot dils 19.2.1962 ei decisiva. Ei giavischan al runal Sedrun-Milez-Cuolm Val success, seigien denton sedecidi definitivamein da buca coordinar cun autras societads e veglien restar independents.

La radunonza generala dalla societad Cungieri hagi deciduu da tener las aczias sin 400.- frs. En nies ravugl ein ins unanimamein dil meini da pil mument schar far e schar semadirar. Ei

seigi denton constatau che la societad sutgera hagi quels onns d'existenza menau in bien quen, hagein scret giu in grond procent dil deivet ed aschia hagi buca tunschiu ina dividenda per ils acziunaris.

Appartenent il niev runal Valteva, baghegiaus da signur Battesta Soliva e cumpan signur Pieder Deflorin e mess en funcziun igl 1. da fevrer 1962, sa la cumissiun pintga da nies comite rapportar il success. Signur Battesta Soliva ceda tenor il rapport gl'entir effect per ils efectivs cuosts plus 5% per sias breigias e rescas. Il recav dalla sesiun 1961/62 audan medemamein a Soliva e Deflorin. Sin fundament da quella sesiun presentan oz omisduas parts in sboz da cumprar ed entelgientscha provisorica d'ina vart ed in contract da vendita da l'otra vart. Clar ed entelgeivel sclarescha signur Battesta Soliva sur la calculaziun, sur dils impediments e sur dil cuost tochen oz effectivs cun indicar separadamein ils cuosts ch'ei aunc da far, che las offertas ein gia avon maun e ch'ei per part lavur ch'ei vegnida pretendida tras gl'uffeci da colaudaziun. Il calcul eri 132'000.- frs. e muossi definitiv tochen tier la suradada inclusiv ils 5%, rodund 141'774.- frs. Liunga discussiun dattan in per privilegis che signur Battesta Soliva e siu cumpan han en siu sboz da vendita e vid ils quals els setegnan sco rascha. Ei appartegn ils privilegis da dretg da menar ustria a Valteva ni a Milez sch'ei dat ustria sil plaz entras Battesta Soliva e per Pieder Deflorin il dretg da far menaschi da taxi da Sedrun – Rueras sch'ei vegni arranschau tal traffic official dalla societad runal Dieni – Cuolm Val, ni la piazza da caposurvigilader dil menaschi runals.

Ils dretgs d'ustrias e la maniera da menar en in traffic Sedrun – Rueras viceversa vegnan dils representants da Rueras defendi detschartamein.

Generalmein ein ins dil meini ch'ins astgi buca conceder privilegis persunals, ei stuessi silmeins esser en il plaid sco la concorrenza. Quels votums vegnan argumentai da nos seniors Baseli Huonder e Benedetg Deflorin.

Per conclusiun da quella tractanda vegn schau sura al president Christian Berther, al cassier Theophil Schmid ed agl actuar sco suprastonts, da far in contract e da securvegnir cun Battesta Soliva. La sesiun ch'ha cuzzau quater uras vegn concludida cun gl'engraziament dil president per la pazienza e per gl'interess demussau.

Per fatg dil sura

Actuar Victor Berther

Radunonza dalla suprastonza cun signur Battesta Soliva e Pieder Deflorin el restaurant dalla Pensiu Soliva, ils 30 da mars 1962

Tenor conclus dalla cumissiun da runal dils 29 d.q. meins seradunein tier Battesta Soliva per tschentar si il contract da cumpra provisoric. Quei daventa suenter che nus havein giu priu investa dils quens, dalla lavur da biro, dils contracts culs possessurs ni affitaders da funs, dil rapport digl uffeci da colaudaziun e dils quens da material ch'auda tier gl'inventari. In inventari vegn prius si per tier al surdada digl object. Ei vegn resalvau el contract l'approbaziun dalla radunonza generala d'acziunaris

Per fatg dil sura

actuar Victor Berther

Radunonza dalla cumissiun en local Cadruvi, ils 27 da matg 1962

Presents ein la cumissiun entira cun excepziun da commember August Bass. Beneventond ils presents arva president Christian Berther cun pign retard la sesiun. Ils dus anteriurs protocols vegnan prelegi. Signur Baseli Monn remarca ch'el hagi bein detg da metter il plaz sper stardun a disposizin per parcar, denton buca ulivar tal.

President Christian Berther orientescha ils presents dalla sesiun cun Battesta Soliva appartenent runal Valteva e prelegia il contract provisoric dalla cumpra. Ei vegn fatg neginas remarcas.

Ei vegn discussionau la damonda stada fatga tier la corporaziun Fontauna S.Gions per l'aua. Quella damonda ei dalla radunonza generala dalla corporaziun vegnida concedida. Signur Baseli Monn less far sia lingia d'aua e vul saver sch'el dueigi preveder per omisduas. Gl'actuar Victor Berther ch'ha giu dumandau signur Duri Vigeli Cavegn per dretg da tschaffar da sias fontaunas a Clavadi per diever dalla staziun runal, sa comunicar che Duri Vigeli dessi la concessiun. Suenter entgina discussiun vegn concludiu senza oposiziun da schar studegiar signur inschignier Schneider las duas pusseivladads e tedlar siu pareri. Entras la bilanza digl

onn 1961 e brev dils 12 da matg 1962 vul la suprastanza dalla sutgera Cungieri orientar la cumissiun dalla valeta mercantila da quella ovra. Generalmein ein ils presents commembers dil meini da schar fundar la societad dil runal Sedrun – Milez – Cuolm Val avon che prender auters conclus che quels dil protocol dils 29 da mars.

President Christian Berther prelegia ina liunga brev dil departement digl intern appartenent la damonda da concessiun pil runal. En quella brev ein differentas propostas ed obligaziuns fatgas dil departement da baghegiar al departement digl intern. Ei vegn pretendiu in parc tenor ordinaziun, contrahar cun viafier, la lubientscha per eveltuals placats da reclama, segironza visavi viafier, marcar las zonas periclitadas da lavinas, marcar pista ed auter pli. La risposta da president sin quei scriver cuntenta tuts presents. Dapli communichescha president ch'el hagi supplicau inschignier Schneider da prender si in plan ni project per in parc d'autos e semetter en contact cul departement ariguard las propostas fatgas da quellas varts ed orientar nus tgei cuorri e passi. Tuts ein cuntents cun la lavur da president Chrsitian Berther appartenent quei fatg.

Appartenent il plaz per autos vegn aunc liung discussionau. La finala vegn a) priu enconuschientscha ed approbau la lavur surdada a signur Benedetg Deflorin appartenent contract parc cun Baseli Berther, Dieni; b) surdau a Benedetg Deflorin la cumpetenzza da scriver giu contracts per terren da parcar e pagar circa 10 cts p. m³ ni circa 140.- frs. per tschavera. Signur Benedetg Deflorin surpren il dau sura cun la remarca d'auters buca dar denteren ni ira tiels privats cun propostas e cussegls.

President Christian Berther lai dar in rapport sur dil stan dalla cassa dils assegni signai e dils pagamenti fatgs. Quei rapport dat il cassier Theophil Schmid. Ei maunchi oz aunc 35'000.- frs., ei seigi denton ualti carteivel da plirs vegniu emblidau da dar giu ils assegni, el quanti denton ch'ei vegni en aczias avunda. El recamonda denton, da sch'ei maunchi aczias, schar signar era jasters e quei principalmein tals ch'ei per la societad d'engrau. Ins va d'accord cun quella proposta.

Signur Alfred Decurtins, sco president dalla cumissiun tecnica, communichescha che tier ils plans da fundaments per masts, maunchi ils formulars d'offerta. Ins vegn unanimamein perina da schar far arhitect Robert Decurtins la descripziun dalla lavur da miradur e fundaments, sco era formulars d'offerta per lavur da tratsch e cement.

Signur Battesta Soliva remarca ch'ei fussi tuttavia necessari da far cun signur Städeli in contract dalla surdada dalla construcziun tenor las vocalas e verbalas concessiuns d'offerta.

Signur president Christian Berther va d'accord e pren per notizia.

Signur Felici Monn, il qual ei cun in luvrer da signur Städeli en lavur da prender si il profil da terren, vegn cumissiunau da far las cumpras dils suloms da staziuns e masts e far ils respectiv contracts culs privats.

Ei vegn ord il miez la proposta al president communal da schar visar il gerau d'agricultura da metter en uorden la via a Milez per il transport dil material. La via seigi en immens schliet stan e struschamein carrabla cun carga. President Christian Berther pren encunter la moziun e vul empalar vinavon al respectiv gerau la proposta menziunada.

La lavur prestada entras informaziuns da signur president vegn renconuschida ed ins ei cuntents da schar prender contact cun dr. Cadruvi appartenent tschentar si statutas per la nova societad.

Battesta Soliva ch'ha a siu temps giu priu contact cun gl'acziunari grond dalla sutgera Cungieri appartenent aczias, vul saver tgei rispunder a signur Müller. El survegn l'incarica da dar part, che momentan seigi negin interess.

Dapli dat el part ch'ei fussi aunc da far in contract da cumpra alla staziun da runals dil runader a Valtgeva. Signur president Christian Berther e Battesta Soliva vegnan incaricai da serrar quei contract cun eventualmein trer tier il cassier ed actuar a caschun digl inventari dil runader Valtgeva.

A signur Baseli Monn, che vul saver co far cun la lingia d'aua, vegn recumandau da spitgar tochen che signur Schneider ha sclariu giu la situaziun.

Signur president dalla cumissiun, Christian Berther, engrazia als presents per gl'interess ed el vegni a mirar ch'ei cuorri vinavon la lavur perparativa per surdar las lavurs da tratsch e miradur, siara la radunonza suenter in cuoz da circa treis uras.

Actuar Victor Berther

Protocol dalla conferenza cun signur dr. iur. Cadruvi en sala pintga Hotel Cruna, ils 12 da zercladur 1962

Gliendisdis Tschuncheismas allas duas suentermiezdi radunescha president il cassier ed actuar per discussionar cun dr. Caduvi sur la fundaziun dalla societad e tschentar si las statutas conform la lescha. Signur dr. Cadruvi ch'ha gia avon maun statutas, prelegia ed explichescha talas e fa las midadas cun nums etc. tenor basegns.

Dr. Cadruvi dat zaontas instrucziuns giuridicas. Per exempel: Num Skilift Sedrun-Milez-Cuolm Val AG. Las aczias dueigien ins far cul num, pervia dalla controlla. Contracts da cumpra seigien da far immediat. La societad stoppi vegnir scretta ora el register federal da mercanzia «Eidg. Handelsregister» pervia dils nums geografics. Il capital d'aczias stoppi esser avon maun entirs tier la fundaziun dalla societad e quens che stoppien vegnir pagai avon la fundaziun, seigien da pagar cun daners ord ils emprests.

Engraziand per las orientaziuns e sercumandond per ulteriurs sclariments, siara il president Christian Berther la sesiun cun la supplica a dr. Cadruvi da far vinavon cun la lavur ad el surdada.

Gl'actuar Victor Berther

Sesiun dils 24 da zercladur 1962 el local Cadruvi

La sera allas 08:30 arva signur president Christian Berther la radunonza dalla cumissiun, beneventond ils presents, cassier Theophil Schmid, August Bass, Felici Monn, Benedetg Deflorin, Battesta Soliva ed igl actuar Victor Berther. Ils auters treis commembers ein per part perstgisai.

Da preleger il protocol anteriur vegn tralascchau. Suenter l'orientaziun dil scriver dalla banca appartenent credit d'emprest, vegn concludiu da dumandar la ludeivla vischnaunca per segironza dil credit da 350'000.- frs.

Il scriver digl Uffeci da migliuraziun e la respectiva corrispondenza, vegn prelegida. Ei maunchi aunc formalitads cun Viafier Furca Alpsu e detagls dils plans da construcziun. Quei stoppi esser en uorden avon che la concessiun vegni dada.

Sonda proxima vegn signur directur a Dieni per investa ed il president envida en da prender part dalla conferenza. Signur Städeli stoppi vegnir sfurzaus da dar giu ils muncons plans e detagls immediat. Dapli en caussa vegn discussiou la proxima sesiun fixada sin mesjamna proxima, ils 27 el medem liug.

Felici Monn vegn, suenter ch'el ha orientau la situaziun, dau l'incarica d'immediat far contract da cumpra dil sulom dalla staziun per 65.- frs. per fest sco secunvegni cun la reserva digl emprem dretg sin il restont terren dil medem proprietari per medem prezi.

Appartenet la lingia d'aua cun Baseli Monn ein ins dil meini ch'ins sappi era preveder la lingia da menar naven l'aua tschuffa per nus. Davart ils bishels per aua vul ins star dil conclus dils 27 da matg 1962.

Signur Benedetg Deflorin orientescha davart las entelgientschas fatgas cun privats appartenent il plaz da parcar. El senn dallas entelgientschas dueigi vegnir serrau contracts perfetgs.

Felici Monn orientescha sur da differentas lavurs che stoppien vegnir fatgas sin la lingia stagiada ora, sco via cun mir, metter bishels da cement per dutg Plaun d'Eras, translocar otg lattas lingia electrica etc., tgi ch'ha giu priu investa dalla stagiada dallas staziuns a Milez e malcuntents cun ils prevedi plazz. En quei senn appeleschan Benedetg Deflorin, August Bass e Battesta Soliva ed ins vegn perina da prender investa dalla situaziun per mirar sch'ei detti pusseivladads cuntenteivlas senza esser impediments per ina favoreivla pista e da mirar ch'era signur Städeli seigi presents a quella conferenza.

Signur president Christian Berther prelegia las statutas tschentadas si da dr. Cadruvi, las qualas vegnan discussionadas. En artechel 2 seigi da schar orientar ina clausa e artechel 18 midar e schar deponer mo ina aczia enstagl duas. Entras tscharna approbeschan ils presents ils statuts.

Suenter che signur Felici Monn ha danovamein priu enconuschientscha dalla lavur stada suradada ad el, giavischa el ch'ei vegni aunc dau sura ad in commember da cun el ensemen far ils contracts cun ils privats. Signur Baseli Monn ch'ha gl'atun vargau giu fatg ils contracts provisorics, vegn eligius sco gidonter. Il president siara la radunonza, avisond ils presents sin la radunonza da mesjamna sera ed engrazia per la pazienza.

Per fatg dil sura
Actuar Victor Berther

Conferenza dils commembers dalla cumission en Ca'Nossa, ils 26 da zercladur 1962

Sin recumandaziun da commember forester Baseli Huonder ch'ha miserau ora il sulom dalla emprema staziun dil runal, da cumprar giu igl entir toc dil possessur, essend il prezi da cumpra tut pli favoreivels, seconferin en Ca'Nossa cul proprietari dil prau. Quel fa ina damonda pauschala da 9000.- frs. per gl'entir toc da circa 265 festes, che fagess cira 34.- frs. per fest, visavi 65.- frs. il fest da prender giu mo ils necessaris 100 festes prau sco discussionau. Presents a quella conferenza eran president Christian Berther, forester Baseli Huonder, Baseli Monn, Benedetg Deflorin, Alfred Decurtins, Theophil Schmid e Victor Berther. Havend discussionau la situaziun, havein anflau per prudent d'acceptar la purschida dil possessur sco proprietari e vendider dil sulom e da pagar ils 9000.- frs. pauschal per gl'entir frust. Anflond quella sliigiaziun per favoreivla per la societad dil runal, essan cuntents e cun entgin retard serendin tiel gentar da perdanonza da s.Vigeli.

Per fatg dil sura
Victor Berther

Radunonza dils 27 da zercladur, local Cadruvi

Presents: Christian Berther, August Bass, Felici Monn, Battista Soliva e Benedetg Deflorin. Arvend la radunonza vegn discussionau la damonda da credit tier la vischnaunca e concludiu da dumandar 350'000.- frs. sin recumandaziun e ponderaziun da cassier Theophil Schmid. Signur president presenta treis brevs serradas cun las offertas per l'emprema secziun dil runal Dieni – Milez e reparta talas per schar arver ellas e cumparegliar.

Ins constatescha in grond surpli dil calcul staus fatgs ed ins sesmarveglia d'ina aschi gronda differenza. Cun unanima tscherna vegn decidiu da surdar la lavur alla firma Murer SA, Sedrun.

Entras proposta vegnan signur Battista Soliva e Benedetg Deflorin incaricai da cumprar giu il prau dalla staziun da runal Valtgeva, tenor proposta da signur Battista Soliva, nies grond Benjamin. Alfred Decurtins fa attents ch'ei cunvegna da metter el contract cun las firmas il termin da finir las lavurs.

Per orientaziun communicescha il president, che venderdis proxim vegni signur Städeli ed el envida en ils presents da prender part dalla seduta a Milez appartenent midar stagiada e da suenter metter el schuber il contract cun tal signur.

Unanimamein van ins d'accord da buca far in'atgna construcziun da schubergiar l'aua tschuffa, mobein separticipar cun la casa da giuvenils da Baseli Monn e da pagar ½ dils cuosts cun lez per foss e lingia da bishels da cement.

Per fatg dil sura
Victor Berther

Uatga a Milez, ils 29 da zercladur 1962 cun signur Städeli

Presents: Christian Berther, Alfred Decurtins, Baseli Monn, Battista Soliva, Benedetg Deflorin, August Bass e Victor Berther.

Arrivond a Milez e prendend investa dallas staziuns e stagiadas, vegn disputau, ponderond, meditond ed empau midadas e concessiuns e diversas pusseivladads. Essan serendi sigl ault dil Cuolm Val cun gl'apparat da filar e stagiou ina rutta sco adina giu en egl e quei cun schar liber al construider d'encurir il pli favoreivel terren. Returnond a Milez ha mo quel ch'ha cletg da siglir cul tgau encunter ils mirs senza sefar mal, giu il cletg dils magliagroma da S.Pieder e S. Paul. Auters ein dil senior Benedetg Deflorin vegni saziai cun in savurus caffè cauld da mises, il qual ha fatg detg bein, pertgei sigl ault era ei freid e bletsch.

Returnond a casa, vegn fixau ina sesiun immediat a Sedrun cun signur Städeli per metter en uorden il contract e diversas.

Radunonza a Sedrun la sera dils 29 da zercladur 1962

Presents: signur Städeli, Christian Berther, Baseli Huonder, Baseli Monn, Theophil Schmid, Battista Soliva, Alfred Decurtins, Benedetg Deflorin e Victor Berther.

Beneventond en nies miez signur Städeli, vegn prelegiu in sboz per in contract e sin fundament dall'offerta e sin fundament dalla corrispondenza e dils protocols vegn fatg las necessarias remarcas e correcturas. Sereferend sin ina radunonza d'ina cumissiun pli pintga dils 20 da mars, vegn seteniu vid l'offerta primara e fatg las staziuns a val en betun e buca en fier, per haver gl'avantatg dils 5% sconto. Quella radunonza haveva era dau sura a president dalla Installaziun electrica Sedrun da preparar il project per l'electrificaziun cun signur Graf. Per far il transport a Milez era ei stau provediu in jeep ni maschinas agraras. Il prezi d'offerta ei 533'688.- frs. cun masts galvanisai ni 525'000.- frs. cun ferradira stihada.

Ils 5% sconto ein gia tratgs giu en sura prezis. Pagaments ein da far:

- l'emprema ratta 180'000.- frs. tochen ils 15 da fenadur 1962

- secunda ratta 180'000.- frs. tochen ils 15 d'october 1962

- tiarza ratta 100'000 tochen ils 31 da december 1962

- il rest fin sesiun, igl emprem d'avrel 1963

La suga accessoria vegn messa a disposiziun per 6100.- frs. cun in tscheins meinsil da 600.- frs. per las firmas che fan diever, excepiu il construider. Signur Städeli giavischa dus umens dalla cumissiun da prender investa dalla nova rutta a Milez – Cuolm Val, culla stagiada ei fatga. El crei senz'auter che la nova prevedida stagiada seigi aschi ideala sco quella d'ussa. Entras tscherna unanima vegn concludiu da far la midada sco sentelli sil Cuolm e Milez. Signur Städeli sincerescha da far ils plans e immediat tarmetter en tals al cantun tenor giavisch.

La staziun a Dieni vegn concludiu cun tscherna da baghegiar tenor plan avon maun, da far las tualettas, luvratori e la cassa cun ziaghels e far il tetg cun tievlas. Sin remarca da Baseli Monn, appartenent staziun da transformer tenor in plan falliu da signur Graf, vul Städeli immediat prender contact cun tal signur.

Signur Städeli ei fetg optimists, el hagi gia fatg ils masts e recamonda da dar via las lavurs dalla secunda secziun ton pli spert. Appartenent ina segironza electrica sco runal a Valtgeva, va el immediat d'accord da montar. Sin recumandaziun vegn concludiu da far ina segirada encunter tiarzas persunas gia immediat era per il temps da baghegiar, essend igl empustader responsabels. Ella discussiun vegn generalmein giavischau da far ton pli gleiti la radunonza da fundaziun, sche pusseivel avon l'emprema mesadad dil fenadur.

Suenter quella liunga uatga e sesida ein ins perschua di d'haver fatg buna lavur e president Christian siara la radunonza ed engrazia en quei senn.

Per fatg dil sura gl'actuar

Victor Berther

Sesiun cun Battesta Soliva, Sedrun, ella Cruna appartenent igl inventari dil runal Valtgeva, ils 6 da fenadur 1962

Avon la conferenza avisada cun signur dr. Cadruvi presenta signur Battesta Soliva e siu cumpan Pieder Deflorin als commembers dil comite runal Dieni – Milez, president Christian Berther, cassier Theophil Schmid ed actuar Victor Berther, ils acts digl inventari dil runal e tut ils quens dallas spesas, ils quens dils contracts, dallas lubientschas e tut ils acts digl inventari en schischom e movent. En ina mappa bein a schuber cavegliu e sortiu, san ins prender investa da tut la lavur da biro, dils contracts e dretgs da transit etc.

Havend giu fatg controlla dil presentau ed anflau per uorden, havein interrut quella conferenza per cuntinuar suenter la sesiun cun dr. Cadruvi. Lura essan serendi a Salins, controllau gl'object tenor inventari, schau metter en funcziun la maquinaria. Enstagl da Theophil Schmid ei lura Alfred Decurtins staus presents. Nus havein anflau ch'igl inventari consteti cun il verbal dil register e havein priu giu gl'entir fatg per 152'000.- frs. sut cundiziun dalla approbaziun dalla radunonza generala e cun la cundiziun da metter a strada e dar enta maun il runal all'entschatta dalla sesiun d'unviern 1962/1963. Las actas e clavs surdat Battesta Soliva a president Christian Berther ed envida ils presents tier ina marena giavischond bien success alla nova societad.

Actuar Victor Berther

Conferenza cun dr. Cadruvi el Hotel dalla Cruna, ils 6 da fenadur 1962

Allas uras fixadas seradunan signur dr. Cadruvi, president Christian Berther, Theophil Schmid, Benedetg Deflorin, Baseli Huonder, Battesta Soliva, Alfred Decurtins, Baseli Monn e

Victor Berther. President Christian Berther arva la radunonza beneventond en spezial dr. Cadruvi. Ei vegn discussionau las prevedidas midadas vid las statutas. La radunonza da fundaziun dueigi era vegnir scretta ora el Fegl ufficial grischun. Acziunaris da mo in'aczia che sorprendien in uffeci dalla nova societad sappien deponer en bar la differenza (Statutas prevedan ina deponia da duas aczias.)

Per la radunonza da fundaziun recomonda dr. Cadruvi al president da preparar in rapport dils conclus pri e constatar che las aczias seigien pagadas en. Aczias annunziadas e buca pagadas ein da schar avisar la banca cantunala e dar il termin tochen ils 15 da fenadur 1962. La radunonza da fundaziun vegn fixada sin ils 29 da fenadur 1962 allas 13:30 uras el Hotel dalla Cruna. Dr. advocat Cadruvi surpren da far las necessarias lavurs preparatoricas ed esser presents alla fundaziun. Sco organ da controlla vegn eligiù il biro fiduziari Geiger, Glion. Las statutas ein da copiar e metter tier a tut ils acziunaris cun l'invitaziun e plenipotenza. La damonda per il num dalla societad ei da far immediat a Bern. Las tractandas vegnan fatgas enconuschentas ella proxima radunonza dalla cumissiun. Dr. Cadruvi cusseglia da preparar las propostas dalla suprastanza dalla societad gia ordavon per buca vegnir surpri da surprisas. D'eleger per quei di eis ei in president, in actuar e dus dumbravuschs. Per quels dus funcziunaris vegnan proponi signur Battesta Soliva e signur scolast Vigeli Berther, ils quals vegnan gia ordavon instrui da signur dr. Cadruvi. Per quei sedeclaran dr. Cadruvi d'esser presents ils 29 da fenadur avon messa per sclarir giu culs dumbravuschs necessaris facturs che basegnan tier la radunonza da fundaziun. Aczias representadas basegnan ina plenipotenza.

La firma Murer ha ses luvriers e capos ch'han en la febra da lavur gia cavau ils suloms per masts da Milez tochen oragiu Putnengia ed ein stai caschun da differentas reclamaziuns da privats visavi la cumissiun dil runal. Essend ils contracts da cumpra dils suloms buca fatgs cun ils privats, orientescha signur Baseli Monn ils presents. Essend ch'el seigi malsaus admetta el sia elecziun. Signur Baseli Huonder e Benedetg Deflorin, ils seniors da nies gremium, vegnan incaricai d'immediat far ils contracts da cumpra. Suenter empau sedustar e seperstgisar, surprendan ils dus seniors tuttina e tuts ein persuadi ch'ei vegn ussa fatg zatgei positiv.

Cun quei sei stau finiu.

Gl'actuar Victor Berther

Davosa radunonza dalla cumissiun per runal avon la fundaziun ufficala dalla societad en local da vischnaunca Cadruvi, ils 26 da fenadur 1962

Presents: president Christian Berther, cassier Theophil Schmid, Benedetg Deflorin, Alfred Decurtins, Baseli Huonder, August Bass, Battesta Soliva ed actuar Victor Berther.

Baseli Monn ei el spital, Felici Monn ei buca seperstgisaus. Signur president arva la radunonza e fa las suandontas communicaziuns, las qualas eran necessarias avon la radunonza da fundaziun da dumengia proxima.

1. Contract cun Städeli seigi ussa perfetgs.
2. Dr. Kunz dil departement hagi empermess per telefon la concessiun dil cantun e sche pusseivel a scret tochen dumengia.
3. Segirada encunter tiarzas personas ei serrada giu cun la Zürcher per ina premia da circa 450.- frs. annual.
4. Il plan Schneider per ils plazs da parcar seigi avon maun ed acceptaus dil departement.
5. La lubientscha federala per duvrar il num uffical per il runal seigi avon maun.
6. Appartenent finanziaziun dat il cassier l'orientaziun. Dils 12'200.- frs. che mauncan ein 3672.- frs. buca signai ed en contact cun signur cassier communal Giachen Hendry, ein ins secunvegna aschia che la vischnaunca segna quei rest, sinaqui ch'ei seigi tier la fundaziun 100% cumplet.
7. Las difficultads che vegnan fatgas per ils 70'000.- frs. pagai a Battesta Soliva per il runal Valtgeva, vegn pretendiu in contract fingiu (Scheinvertrag) ch'ha valeta mo tochen suenter la fundaziun. Quel vegn aunc quella sera mess en uorden.
8. La gliesta da tractandas vegn prelegida e proponiu da menar la radunonza da fundaziun da dumengia alla suandonta fuorma:
 - a) Signur president Christian Berther dueigi sco parsura orientar dil curriu e passau e la presenta situaziun.

- b) Dueigi, sche pusseivel, Christian Berther vegnir eligius sco president dil di.
- c) Prelecziun ed approvaziun dallas statutas (eventualmein entras dr. D. Cadruvi).
- d) Cun tscherna vegn decidiu da proponer el cussegl d'administraziun 5 commembers plus dus dumbravuschs.
- e) Quels duessen esser reparti sils vischinadis, circa Sedrun – Gonda 2; Camischolas – Zarcuns 1; Rueras 2 ed ils revisurs in per liug cun il biro fiduziari Geiger. La vischnaunca duess sco la capoacziunaria haver dus commembers el cussegl d'administraziun.
- f) Vegn discussionau la lavur dalla administraziun e d'in schef da menaschi ch'il cussegl d'administraziun ha d'eleger e circumscriber las plenipotenzas ed obligaziuns.
- g) Vegn en absenza da Theophil Schmid aviert las offertas per la secunda secziun. Gl'ei quei stau ina sorpresa ed ins ha paregiond las posiziuns anflau in per gronds sbagls en ina offerta. Perquei han ins buca saviu sedecider da surdar la lavur. Unanimamein van ins d'accord da surdar il studi dallas offertas ad arhitect Robert Decurtins per controllar e dumandar sch'el sorprendessi la survigilanza dallas lavurs vid runal etc. e far in'offerta per quella lavur. Quei ei stau la finiziun da nossa davosa radunonza avon la fundaziun e nus essan perschuadi che tuts presents commembers han fatg il pusseivel per il beinstar e prosperar dalla societad dil runal

Sedrun- Milez – Cuolm Val SA

ed ei vegn giavischau alla aunc nunenconuschenta suprastonza bien maun e cletg.

Per fatg dil sura segna actuar

Victor Berther

Protocols dalla Societad da runal Sedrun-Milez-Cuolm Val SA, fundada ils 29 da fenadur 1962

Radunonza da fundaziun dalla societad dil runal Sedrun – Milez – Cuolm Val SA el Hotel dalla Cruna a Sedrun, ils 29 da fenadur 1962

Cun entgin retard arva president communal Christian Berther, sco parsura dalla cumissiun preparatorica dil runal, la radunonza en sala gronda dil Hotel dalla Cruna, beneventond ils presents acziunaris. El prelegia in extendiu rapport sur dil curriu e passau, sur dil present stadium da lavur e sur dil pensum ch'ei aunc d'absolver. En quei preludium tanghescha il signur president ils suandonts puncts:

1. Fa el beinvegni a signur dr. jur. Donat Cadruvi sco persuna ufficala e notar; a biro fiduziari Geiger, sco biro da controlla; a directur dalla Viafier Furca Alpsu.
2. Fa el menziun dalla radunonza da vischnaunca dils 7 da schaner 1962 sin la qualla la cumissiun propona:

- a) da fundar ina societad acziunara
- b) che la vischnaunca dueigi haver 51 % dallas aczias
- c) che la vischnaunca dueigi dar la concessiun
- d) da far aczias da 200.- frs.
- e) d'unir sche pusseivel tut las societads da quella natira
- f) duei la vischnaunca en emprama lingia dar alla societad il dretg d'ustria, sch'ei vegn dumandau.

La radunonza da vischnaunca ha approvau las propostas e reelegiu la cumissiun. Havend giu differents concurrents seigien els seresolvi da dar via las lavurs entochen oz per 843'680.- frs. La finanziaziun: 450'000.- frs ord capital d'aczias, 250'000.- frs emprast hipotecar e 350'000.- frs. cun segironza.

La fusiun dil runal Valtgeva ei daventada entras cumpra da signur Battesta Soliva e Pieder Deflorin sco vendiders e per la societad acziunara ils commembers dalla cumissiun per approvaziun dils acziunaris tenor protocol da cumpra. Per far las caussas legalmein valeivlas per la fundaziun dalla societad, havein tratg tier signur dr. Cadruvi e per controlla dallas aczias e menaschi ei vegniu tratg tier signur Geiger da Glion.

La cumissiun ch'ha oz finiu siu pensum giavischau alla societad beinstar e success ed il president engrazia en num dalla vischnaunca alla cumissiun per la lavur da preparaziun. El concluda quella orientaziun surdond il pensum e missiun da menar vinavon l'ovra e radunonza els mauns dils presents acziunaris.

Havend il mument la societad negin timun, vegn proponiu per il biro dil di signur Christian Berther sco president e gl'actuar dalla cumissiun sco protocolist dil di Victor Berther. Omisdus vegnan eligi. Ils dumbravuschs elegi gia ordavon ed entras la radunonza approvai, signur Battesta Soliva e scolast Vigeli Berther, constateschan: aczias presentas 511; aczias representadas 1328; total aczias 1839. Acziunaris en tut 107 presents, aczias maunca ei total 411, pia exista la societad ord 2250 aczias.

Signur Christian Berther, sco president dil di, passa tier la prelecziun dallas statutas tenor uorden dalla gliesta da tractandas. Las statutas ein vegnidas tarmessas tier a mintga acziunari cun l'invitaziun per studi, aschi ch'ei vegn seteniu si mo cun artechels che basegnan l'orientaziun ni che vegnan en discussiun sin fundament da remarcas ord il miez.

Emprema remarca fa signur gerau Gion Crisost Caduff, il qual propona da midar il num cun Rueras ni Dieni, enstagl Sedrun. Signur Christian Berther e Theophil Schmid argumentan las raschuns sefundont sin la propaganda e reclama dall'uniun da sport e skis cun Sedrun e dr. Cadruvi manegia da per la fundaziun star tier quei num, havend gia stuiu dumandar avon la fundaziun la lubientscha a Berna per il num. Ei seigi la pusseivladad da dumandar ina midada dil num en fuorma dalla proposta da gerau Gion Crisost Caduff. Signur Benedetg Valier propona da far tscharna. Ei vegn votau e cun maun pli vegn decidiu da star tier il num da batten.

Tier gl'artechel 3 vegn prelegiu l'annexa dil contract cun Battesta Soliva, ch'ei ina caussa provisorica per la fundaziun.

Gl'artechel 5 vegn en discussiun entras signur Baseli Gieriet che damonda orientaziun. El giavischa che mintga acziunari astgi disponer dallas atgnas aczias. Signur dr. Cadruvi rispiunda: Gl'artechel 5 seigi :

- a) per ch'il cussegl d'administraziun hagi controlla dallas aczias
- b) vegli quei artechel prevegnir che las aczias vegnien vendidas ord vischanunca
- c) prevegnir che mo domiciliai vegnien en possess dallas aczias
- d) seigi da dar liber il negozi d'aczias denter burgheis

Signur Clemens Berther damonda co ei mondi cun aczias che vegnan en auters mauns entras ierta. Signur Cadruvi rispunda, legalmein ei negin ch'ha regress visavi las aczias en cass d'iertal. L'ierta ei buca ina vendita e va tier a negin nuot. Giusep Berther-Valier vul schar vender las aczias en vischnaunca senza salidar l'administraziun. Signur dr. Cadruvi rispunda en medem senn sco a Baseli Gieriet e quenta che la suprastonza dalla sutgera detti era liber denter burgheis, hagi denton ina controlla dil menaschi endretg, mo lu sch'ei vegni annunziau e dumandau la lubientscha da vender.

Tier artechel 10 vegn entras tscharna concludiu da tarmetter las invitaziuns 10 dis avon la radunonza enstagl 14 dis.

Artechel 13 lai liber da metter 3 ni 5 commembers ed ins propona 5 commembers el cussegl d'administraziun.

Havend finiu la tractanda statutas fa signur Giachen Martin Valier la proposta da metter quels en romontsch.

Dr. Cadruvi rispunda che quei seigi bein pusseivel ed ins sappi procurar ina translaziun, denton stoppien las statutas esser screttas per tudestg per schar approbar ellas a Berna il respectiv uffeci da negozi a Berna, q.v.d la Confederaziun ha approbau il romontsch per lungatg nazinal, denton buca per lungatg uffical. Per il Grischnun fussi il romontsch approbaus sco lungatg uffical.

Entras tscharna vegnan las statutas approbadas cun las sura allegadas remarcas tier ils respectivs artechels sco allegau.

La societad ei cun quei act pia legalmein fundada ed ins passa tier las elecziuns dil cussegl d'adminsitraziun per la societad dil runal.

Sco president vegnan proponi signur Theophil Schmid, signur gerau Francestg Berther e president dil di Christian Berther. Sco candidat resta sulettamein signur Chrsitian Berther, essend ch'ils auters retilan dal post. Theophil Schmid fa la tscharna sin president communal, il qual vegn eligius senza cuntervuschs.

Per ils quater ulteriurs commembers dil cussegl d'administraziun vegnan proponi ord il miez: Theophil Schmid-Valier, Battesta Soliva, Felici Monn, August Bass, Giusep Cavegn, Benedetg Deflorin, Tumaisch Beer e Victor Berther. Signur Francestg Berther argumenta siu meini che la vischnaunca astgi e dueigi esser representada entras 3 commembers, havend 51 % dallas

acziar e Benedetg Deflorin sco president dalla cumissiun quen audi denter en. Seretratgs sco candidats fuvan tochen ussa Battesta Soliva, August Bass, Benedetg Deflorin, Giusep Cavegn e Victor Berther, mintgin argumentond ils motivs.

Signur Benedetg Deflorin vul pia restar a disposiziun sco president dalla cumissiun da quen, fa denton la remarca ch'il president dalla cumissiun da quen futur, surprondi era quei uffeci. Signur Toni Hitz vul che mintga proponiu passi las tortas, ei seigi buca fatg cun schar strihar il num.

Signur Sonder, sco representant dalla fiduziara Geiger dat part ch'il pli dallas acziar elegi ils commembers.

Cunquei ei dau ina situaziun ualti critica. Sin las remarcas da signur Theophil Schmid e recumandaziun, retila era Victor Berther sco actuar dil di sia abdicaziun, aschia ei avon maun per l'elecziun aunc sis proponi.

Signur gerau Giachen Hendry, che representa tenor dir da signur Chrsitian Berther las acziar dalla vischnaunca cun 51% ei quei mument persuls responsabels per l'elecziun, vul haver ina conferenza cun ils ulteriurs commembers dalla suprastanza per discuorer ed ei seretilan in mumentin, relaschond signur president communal ch'ei gia eligius e signur gerau Francestg Berther ch'ha da passar las tortas.

Signur gerau Gion Crisost Caduff dat part la decisiun e propona signur scolast Theophil Schmid-Valier, signur gerau Francestg Berther-Venzin, signur president dall cumissiun da quen Benedetg Deflorin ed actuar dalla cumissiun e dil di Victor Berther. Quels quater commembers ein pia proponi. Vegl hotelier Christian Berther-Rhyner, che pren activamein part dalla discussiun vesess bugen ch'ei vegness risguardau in commember dall'unium da cura e traffic e propona da setener vid signur Felici Monn ch'ei parsura da quell'unium. Signur Felici Monn che vesa ch'ei ha negina valeta da schar far la tscharna, essend che 51 % dallas acziar han gia votau, seretila, menziunond ch'in outra gada fussi da resalvar in plaz per in commember dall'unium da cura e traffic.

Generalmein han ins l'impressiun che la maniera, sco gl'ei vegniu fatg diever dalla plenipotenza dalla acziar messas dalla radunonza generala da vischnaunca, seigi buca applicadas cuntenteivel e per quella raschun propona signur gerau Bruno Soliva il meini che la suprastanza pondereschi d'eleger ils commembers che representan la vischnaunca entras la radunonza da vischnaunca ni la cumissiun gronda.

Signur dr. Cadruvi sustegn quei votum ed ei hagi buca bia senn da scrutinar. In scrutini havessi exact il medem resultat, essend ils 51% els mauns dallas propostas.

Cun tscharna vegnan ils proponi eligi tenor rapport dil biro da controlla. Sut varia ei negin che pren il plaid e la gliued banduna la sala cun prescha e nus eligi che restein anavos, havein in schliet sentiment pil futur. E nus sedumandein mo, schebein la cumissiun preparativa ei la caschun dalla confusiun. Denton basegna ei ussa da semetter el timun a luvrar, panzar e studegiar pil beinstar dalla societad, perschuadi che la raccolta dalla lavur e dallas stentas ein buca arbagias.

La conclusiun ed igl engraziament per la pazienza davart il president, han mo paucs dils acziunaris udiu, essend la sala sesvidada ualti spert.

Per fatg dil sura

gl'actuar dil di Victor Berther

Radunonza ell'ustria dil Kreuzlipass cun signur Städeli, ils 31 da fenadur 1962

Signur Städeli ch'ei quei di arrivaus cun l'emprema carga da masts e cun in auto plein uorden per la suga da Milez – Cuolm Val, vul dispet ina conferenza sil di cun tuts commembers ch'eiin pussevils da survegnir sil di. Presents ein: Christian Berther, Theophil Schmid, Victor Berther, August Bass ed Alfred Decurtins.

Signur Städeli fa las suandontas propostas :

1. Immediatamein seigi da mirar ch'il sorprendider dalla secunda secziun metti silmeins 100 m³ chis a disposiziun a Milez. El pretenda 2 jeeps a disposiziun per il transport.
2. Metter ils masts a liug tenor ordinazun da signur Alfred Decurtins ch'ei orientaus.
3. Recumondar alla firma Murer da finir la staziun finala dall'emprema etappa a Milez e metter bein a guvern la fuorma.
4. Curreger il terren da Putnengia a Milez, el hagi orientau signur Wolf, eventualmein metter en luvrers privats.

5. Prendend investa dalla staziun a Putnengia, decidin da schar sfundrar silmeins 1 – 1.20 m, essend ch'ei dess in mir piars da 5.20 m giusut. Sisura vegn lu aunc il baghetg.

Victor Berther

Radunonza dalla cumissiun, la sera dils 31 da fenadur 1962 el local Cadruvi

Presents la niev eligida suprastonza ed August Bass, Alfred Decurtins, Baseli Huonder, Battesta Soliva.

1. Vegn mess avon e prelegiu il document public da dr. Cadruvi per suttascriber tenor indicaziun d'in scriver dils 30 da fenadur.

2. Vegn dau part da pagar en la taglia federala.

3. Vegn orientau dalla sesiun da suentermiezdi e dil conclus prius appartenent baghetg a Dieni – Putnengia.

4. Da rugalar il trasse tenor proposta Städeli, vegn manegiau da spetgar tochen ch'il fretg ei fatgs.

5. Cassier Theophil Schmid recamonda da metter en uorden era ils contracts da sulom e transit per la secunda secziun. Per quei intent vegnan ils seniors Baseli Huonder e Benedetg Deflorin tscherni ora ed han da contrahar cun la suprastonza communal.

6. L'elegida suprastonza dil runal gaivischa che l'entira cumissiun resti sin posta. Ils presents vulan esser gideivels, denton buca surpender cumpetenzas administrativas.

7. Vegn decidiu che Chrsitian Berther, Theophil Schmid e Victor Berther ein cumpetents tenor artechel 17 da signar acts, mintgaga dus ensemen.

8. Per retrer daners dalla banca segnan president Chrsitian Berther e cassier Theophil Schmid.

9. Vegn concludiu d'immediatamein scriver ora en concorrenza il transport dils masts deponia Dieni sil plaz da parcar.

10. Vegn prelegiu il pareri d'arhitect Robert Decurtins appartenent las offertas dalla secunda secziun sco giu concludiu ils 26 da fenadur. Ensemen havein concludiu en assenza dils commembers dalla cumissiun e Theophil Schmid, mo la suprastonza ed en nies miez gerau Francestg Berther sco niev eligiu, da surdar a Robert Decurtins la survigilanza e da far cun el in contract. Appartenent propostas da Robert Decurtins visavi l'offerta, encurrin si Robert Decurtins e seconferin ell'ustria Krüzlipass. Leu havein la finala dau sura a Robert Decurtins d'aunc prender contact cun las firmas Murer e Loretz e preparar in eventual contract da surdada per quella firma che vegn en damonda.

Gl'actuar

Victor Berther

Sesiun tiegl'Uffeci dil register funsil a Camischolas, ils 5 d'uost 1962

President Christian Berther, vicepresidente Victor Berther e Benedetg Deflorin cun il possessur vegnan ensemen tier mistral Vigeli Berther per signar la cumpra dil sulom a Putnengia.

Silsuenter vegn liquidau:

1. Contract da cumpra dil runal Valtgeva cun Battesta Soliva.

2. Contracts da suloms per masts e passadi da Dieni e Milez.

3. Cunvegrientscha dil plaz da parcar culs differents possessurs.

Victor Berther

Sesiun dalla suprastonza el local Cadruvi dils 5 d'uost 1962

Presents tuts tschun commembers dil cussegl da survigilanza, d'administraziun.

1. Vegn prelegiu ina brev da Bern appartenent tarmetter las statutas.

2. La lubientscha da baghegiar dil cantun cun bia remarclas e terminaziuns

3. Vegn decidiu da dar part al cantun ch'ins prevedi la colaudaziun enteifer il december 1962.

4. Vegn recumandau da secunvegnir cun VFA appartenent signalisar prighels.

5. Vegn aviert l'offerta da transport dils masts e surdau al sulet offerent per 80.- frs. per mast e far contract da metter ils masts el liug per quei prezzi, quei vul dir tochen Milez, respectiv quels dall'emperma secziun tenor ordinaziun da signur Alfred Decurtins.

6. Francestg Berther e Benedetg Deflorin han da contrahar cun ils privats appartenent ils donns fatgs entras baghegiar, circa ½ dils donns surpren la Firma Murer tenor di da signur Theophil Schmid.

7. Ei vegn prelegiu il protocol dalla davosa sesiun dalla suprastanza.

8. Ei vegn discussionau la damonda appartenent igl indemnisar il duvra la suga da Milez – Cuolm Val. Quei ei da sclarir giu. Il president dueigi semetter en contact cun Städeli.

9. Vegn iu atras las offertas revedidas e returnadas. La firma Murer aveva en sia offerta giu calculau da far senza il transport da Milez si Cuolm Val enstagl da survegnir il mettel da transport per tscheins enta maun, aschia ch'ei san sbassar sia offerta. Signur Theophil Schmid sco representant dalla firma Murer e signur president Berther sco coninteressent dalla firma Lortez ein sabsentai ed ils restonts commembers suprastonts pondereschian seriusamein e seresulvin suenter liunga ponderaziun da surdar la lavur alla firma Murer per la summa offerida da 52'883.- frs. cun la cundiziun da metter gratuit il chis deponius a Dieni silla via a Milez; tenor basegns da sclarir ei il dubi ariguard far diever dalla suga Städeli a Milez e far ils contracts cun Murer e cun il survigilader Robert Decurtins. La firma e Christian Berther vegnan orientai aunc quella sera.

Victor Berther

Sesiun dil cussegl d'administraziun ils 17 d'uost 1962 el local dalla vischnaunca a Cadruvi.

Presents tuts tschun commembers.

Il protocol dils 5 d'uost vegn prelegius e cun in per remarcas ariguard nums scret falli ni buca prezis, approbaus.

Christian Berther sa comunicar ch'el hagi giu endamen cun signur Städeli, ariguard la suga da Milez – Cuolm Val, hagi denton intervegniu nuot concret, Städeli quenta che quei vegnien ins schon perina.

Benedetg Deflorin sa comunicar ch'ei seigi tochen oz aunc fatg negin contract cun la vischnaunca ariguard passadi e suloms sin terren dalla vischnaunca a Milez e Cuolm Val.

President Christian Berther orientescha sur dil contract cun Robert Decurtins sco survigilader, ei seigi aunc fatg nuot. Ella discussiun ei il meini da pagar Robert Decurtins pauschal ni eventualmein cun uras cun circa 2000.- frs. e buca indemnisar cun procents. Ei setracti mo da survigilonza.

Ariguard ina staziun da cabina per telefon pil diever privat sil plaz dil baghetg a Dieni-Putnengia, van ins d'accord da schar far las necessarias informaziuns e damondas per empalar vinavon la damonda tier la PTT.

Empau discussiun dat ina brev dalla KVR ariguard translocaziun dalla lingia d'electricitad a Milez, tras la quala la KVR ei prompta da midar lingia tenor sia proposta. Ils cuosts da circa 6000.- frs- quantan quels signurs dalla KVR che la societad dalla sutgera stuessien purtar. Nus havein il meini che la societad digl implont electric Sedrun, ch'ei nossa furnidra d'energia, duessi contrahar cun la KVR entras siu cussegliader technicher, signur Graf, e nus surdein per quella missiun il scriver alla KVR a signur Benedetg Deflorin, sco president dalla societad d'electricitad per liquidaziun.

Il secund scriver tarmess tier dalla banca, orientescha sur dils acziunaris ch'han bein tschentau ora gl'attest per daventar acziunaris, han tochen oz denton aunc buca pagau en gl'importo. Ei fa la summa totala da 4000.- frs. Cassier Theophil Schmid vul far ina controlla dils acziunaris tenor la registraziun, el crei ch'ei seigi cheu sbagliu cun certins.

Suenter haver discussionau il problem da persunal per il runal, havein nus incaricau il president Christian Berther da scriver ora la piazza per treis luvriers che havessen da gidar tier la montascha digl indrez, per seperfectziunar e seprofitar d'enconuschientschas tecnicas vid la maschinaria, per lura saver eventualmein sorprendere la piazza da maschinist dils runals.

Concludend la sesida, havein anflau per oportun da en corpore visitar e controllar il plaz da lavur sin l'entira lingia e quei forsa ualti spert cun avis dil president.

Victor Berther

Uatga sil plaz da lavur entras la suprastanza dil runal, ils 23 d'uost 1962

Tuts tschun commembers dil cussegl d'administraziun han priu peda da prender investa dallas lavurs fatgas e da ponderar lavurs futuras ed absolutamein necessarias per il funcziunar dil menaschi general per il runal da Sedrun – Milez – Cuolm Val.

1. A Milez havein anflau per indicau da prender investa dallas fontaunas da Tegia Gronda sil Cuolm e da schar luvrar ora signur Theophil Schmid in pign e sempel project per presentar a nus in calcul dils cuosts per tschaffar e menar l'aua tochen alla staziun a Milez. Unanimamein ein ins dall'idea da schar separticipar tuts interessents a Milez ni silmeins dar caschun a tuts da prender l'aua a Milez, cun metter a disposiziun zacontas sromaziuns ella lingia.

Eventualmein fundar ina corporaziun d'acqueduct.

2. A Milez havein giu ina conferenza cun signur Graf appartenent midada dalla lingia electrica KVR e secunvegni sur la midada dalla lingia.

3. Descendend Milez per la rutta dalla suga, prendein nus investa dils donns dalla lavur vid ils sochels e dil terren. La migliuraziun dil trasse dil runal ei en certs loghens tuttavia necessaria ed en enzacons loghens aunc ualti custeivla. Denton ein ins dall'idea d'avon ch'entscheiver cun quella migliuraziun schar tschentar ils masts, stender la suga e prender orda maun da signur Städeli ni siu representant.

4. Ponderond la situaziun dil baghetg a Dieni-Putnengia e la necessitad dall'aua per quella staziun e havend priu investa dallas fontaunas sin prau da Duri Vigeli Cavegn a Clavadi, essan perinamein d'accord d'empruar ora la pressiuin dall'aua da signur Baseli Monn-Hendry cun far in'emprova cun bishels da plastic sin l'altezia prevedida. Signur Theophil Schmid sedeclara prompts da menar atras quell'emprova e dar rapport.

5. A Victor Berther vegn dau sura da dumandar ils da Dieni sch'ei fussien prompts da scuvierer las ruosnas suenter stradun per clauder ora il claus e d'ulivar il material el claus encunter pagament. Cass da negativa risposta dar part a Firma Murer che fagess quella lavur. Perschuadi ch'ei resta aunc in immens pensum da lavur per ils proxims meins, nunditgond il gia avanzau temps, essan serendi a gentar mintgin tier las dunnauns circa allas 12:30 uras.
Victor Berther

Sesiun dils 26 d'uost 1962 en scola Cadruvi

Presents tuts tschun commembers.

Ils dus protocols anteriurs vegnan legi ed approbai. Signur Benedetg Deflorin orientescha dil contract prius cun la KVR appartenent lingia dil current a Milez. Signur Theophil Schmid sa comunicar che las ruosnas per clauder sunter il stradun a Dieni seigien cuvretgas.

L'offerta da Robert Decurtins appartenent survigilanza vegn prelegida ed essend il quen tschentaus tochen oz acceptabels, vegn concediu da dar 12.- frs. per ura cun la cundiziun che Robert Decurtins detti mintga jamna rapport e tschenti quen medemamein mintga jamna. Las tschun offertas avon maun sco luvrers tier montascha vegnan aviartas. Luis Monn, Ignazi Caduff e Robert Schmed vegnan eligi per gidar il fabricant Städeli ed entscheiver ton pli gleiti (en 8 dis). Ei vegnan orientai en scret.

A signur Theophil Schmid vegn schau sura da procurar per in clische e per il necessari pupi da biro cun il segn dalla firma. A president vegn surdau da far la damonda da concessiuin per l'aua tier la vischnaunca.

Victor Berther

Sesiun dils 8 da settember 1962 el local a Cadruvi

Presents quater commembers. Signur Francestg Berther ei seperstgisaus. Il protocol anteriur vegn prelegius ed approbaus.

President Christian Berther prelegia aunc treis annunzias per la piazza da maschinist tier signur Städeli. Tuttas treis offertas ein arrivadas per suenter il termin fixau e vegnan buca pli risguardadas. Denton ein ins prompts da risguardar quels tals signurs per ulteriurs posts che vegnan a vegnir screts ora avon la sesiun.

Signur Christian Berther, president, prelegia ina brev da dr. Cadruvi appartenent publicaziun en ufficial organ sco perviu las statutas.

Signur Graf ha schau vegnir tier ina copia dall'offerta fatga a Robert Decurtins. Ei vegn discussionau aspramein sur dalla cumpetenzia surdada a signur Robert Decurtins ed alla finala surdau l'incarica a signur president e cassier da seconferir directamein cun signur Graf, sco um tecnic per la societad electrica Sedrun, sur las lavurs che ein absolutamein necessarias

els locals dallas staziuns a Dieni e Milez. Ei appartegn quei glischs e lingia per scaldament necessari els locals da basegns.

Ina copia da signur Graf appartenent la midada dil conduct KVR a Milez orientescha sur l'energia e tschaffada da tala per il runal. Ei vegn discussionau passiadamein sur las offertas per acquaduct Milez – Tegia Gronda, ton ariguard lavur da tratsch e d'installaziun. Tenor calcul dallas offertas vegn quei acquaduct sin rodund 25'000.- frs. Generalmein e primarmein van ins d'accord d'aunc inagada retrer offerta da tuts interessents dallas lavurs da tratsch.

Signur president Christian Berther vegnincaricaus da prender contact cun la VFA appartenent il local da spetga a Dieni e s'interessar co quels organs patratgan da spisgiar cun aua lur closets ed eventualmein pagar ina certa summa per ch'ei fetschien las commoditads necessarias e nus sappien allura sabstrahar da quella expensa pigl onn current ni proxim. Signur president dalla soceietad electrica Benedetg Deflorin dueigi prender notizia e menar vinavon la surdada dalla lavur d'electricitad allas staziuns a Dieni e Milez, quei appartegn offerta tochen al baghetg.

Signur Benedetg Deflorin presenta ils contracts da cumpra da suloms e dil dretg da transit sin terren dalla vischnaunca a Milez e Cuolm Val, ils quals vegnan suttascrats ed approbai ed empalai vinavon al registratur funsil. Total vegn in cuost per suloms 720.- frs., per current dalla suga 0.30 cts per meter circa 300.- frs, pia total circa 1000.- frs. cuost.

Nus discussionein l'indemnisaziun dalla cumissiun appartenent sesiuns, lavur e spesas e concludin da schar trer ord il cudisch da protocols 1° las sesiuns dall'entschatta tochen la vischnaunca dils 7 da schaner 1962 en ina etappa. 2° las sesiuns dils 7 da schaner tochen la radunonza da fundaziun dils 29 da fenadur 1962.

Quella lavur vegn fixada sin il firau da sonda proxima, ils 8 da settember tier Victor Berther ensemen cun il cassier signur Theophil Schmid.

Per fatg dil sura
actuar Victor Berther

Sesiun dils 8 da settember

Suenter che Victor Berther e Theophil Schmid han giu fatg la revisiun dallas sesiuns sco prevediu ella davosa radunonza, essan serendi a Sedrun e seconferi cun signur president Christian Berther e nus essan perinamein vegni perina da far ina sesiun cun cassier communal e mirar qualas conferenzas ch'ins vul schar indemnizar la cassa communal ed il rest metter a quen alla societad. Las schurnadas e spesas persunalas che mintga cumissiunau ha, dueigi mintgin tschentar quen ed era quellas spesas dueigi vegnir mess avon al cassier communal a caschun dalla conferenza.

Discussiunond la propaganda e projects da reclama mein d'accord da schar studegiar signur Theophil Schmid las pussevkladads ed era las taxas d'abonements vegnan discussionadas ed ei dat diversas pussevkladads e variantas che dat discussiun per las proximas sesiuns ed ei da prender sin tractanda

Victor Berther

Sesiun dils 21 da settember 1962 el local Cadruvi

Presents tuts tschun commembers cun signur architect Robert Decurtins, il qual ha enta maun la survigilanza dil project runal.

Il protocol vegn prelegius ed approbaus. Benedetg Deflorin less bugen saver, tgei che seigi fatg en caussa aua a Dieni e president Christian Berther rispunda, ch'el hagi tochen oz buc giu caschun da seconferir cun officials dalla VFA ed hagi era aunc negina risposta sin sia damonda per astgar ira cun l'aua atras la lingia, respectiv sut las rodaias ora cun in foss.

Appartenent l'aua per la staziun a Milez, concludiu da far la damonda per la concessiun dallas fontaunas a Cuolm – Tegia Gronda tier la vischnaunca cun caschun dall'emprema radunonza da vischnaunca.

Signur Robert Decurtins ha per saver propriamein tgi che hagi da far ils plans per gl'intern dils bagehtgs e diversas, giu priu persunalmein contact cun la firma Städeli e la risposta vegn prelegida e paregliada cun il contract ed ins anfla contradicziun, e signur president vegn incaricaus da scriver immediat e metter el clar las differenzas.

Unanimamein concludin da far sils baghetgs tetg da stuors.

Per saver far in plaz cuntenteivel sper baghetg a Dieni cun in mir e scarppa per tener il terren, vegn concludiu da prender investa cun Robert Decurtins, da metter tiarms sin nies prau cumprau, cun envidar en ils vischins dil prau. Victor Berther surpren da menar atras quella lavur cun Robert Decurtins, pli gleiti e pli bugen.

Signur Francestg Berther surpren la missiun, ensemen cun Robert Decurtins, da secunvegnir cul possessur da prau pervia d'in tagliament sur la staziun a Dieni.

Christian Berther, Theophil Schmid e Robert Decurtins han surpriu d'ensemen vegnir da Milez engiu per secunvegnir nua e co planar la pista, allontanar crappa e cagliom ed occupar ils luvrers pladi ed era schar prender investa tals dallas lavurs ch'ei da far ed ein buca surdadas alla firma Murer.

Victor Berther prepara per ils uaffens ed emposta empau uaffens per gl'inventari runal.

Theophil Schmid ha dad annunziar il menaschi runal alla Suval e per cass da malsogna alla cassa da malsaus.

Ils luvrers han d'entscheiver l'otra jamna, ils 24-25 da settember e per gliendisdis vul

Theophil Schmid occupar tals vid via plaz da parcar e seiv dil claus da nuorsas.

Per clauder dadens si surdat gerau Francestg Berther a Victor Berther la missiun da procurar per fildirom diagonal ton pli spert.

Robert Decurtins sabsenta havend finiu cun la part tecnica e nus discussionein aunc la part administrativa dil runal, quei ch'appartegn ils bigliets, reclama e propaganda e tariffas.

Unanimamein van ins d'accord d'ira tier l'administrazin d'in semegliant menaschi per schar orientar e schar cussegljar. Appartenent bigliets vegn in signur d'ina firma el decuors digl october per cussegljar e schar empustar tenor giavisch. Mo stuein tochen lura presentar las tariffas.

A Theophil Schmid vegn schau sura da retrer offerta per ina tabla da reclama en in liug exponiu a Dieni ni Putnengia.

Actuar Victor Berther

Sesiun tier Pensiun Badus, Rueras, ils 25 da settember 1962

Presents tier quella radunonza extraordinaria sin giavisch da representants dalla firma Städeli ein stai: signurs Bogner e Städeli senior per Oetwil, president Christian Berther, actuar Victor Berther, cassier Theophil Schmid e Robert Decurtins.

Vegn discussionau la construcziun da lenn per ils baghetgs dil runal sin fundament dils presentai plans e signur Robert Decurtins survegn l'incarica da far ils formulars d'offerta per lavurs da lennari, scrinari, installaziuns sanitaras, lavurs da serrer e da stagner ed era pictur. Las spesas per temps impundiu per ils formulars ed eventualmein detagls da plans, vegnan surpri dalla firma Städeli e pagai a Robert Decurtins. Signur Bogner lai sentir che nus seigien ualti fetg en retard ed els vegnien a tarmetter il material, schi gleiti sco ins sappi metter sut tetg.

Actuar Victor Berther

Sesiun dils 27 da settember 1962 ella Cruna

Presents: president Christian Berther, cassier Theophil Schmid, actuar Victor Berther, survigilader Robert Decurtins.

Luvrer Luis Monn, occupaus a Milez sin la suga, vegn cun damaun libers da siu post, havend la firma Murer finiu cun transport. Ei fuss da transportar ils masts. Tgi ha da far quei?, ei la damonda.

Victor Berther ch'ha sin fundament d'ina discussiun cun signur Theophil Schmid, priu contact cun signur Städeli, sa communicar: da Milez ensi fa la firma Städeli il transport sin agen quen, ei denton prompta da schar far ils transports nus cun bonificar la lavur e cun la cundiziun da prender investa dil plan da repartiziun. El sez ha sincerau per telefon, quanti cun in minimum temps da transport, grazia a ses indrezs da cargar e descargar, cun gliעד endisada. Dapli communichescha Städeli ch'el furneschi gievgia proxima ils restonts masts che seigien ussa ella bognera da zinc ed il gliendisdis sissu vegni el cun sia gliעד per entscheiver la montascha.

Sin fundament da quella orientaziun, decidin perinamein d'occupar Luis Monn proximamein per lavur privata dalla societad.

Signur Theophil Schmid communichescha ch'el hagi dau sura ad ina firma ils placats da

propaganda a Dieni – Putnengia. Victor Berther presenta in prospect dalla firma Aeby ed in dito dalla firma Rapid per indrez vid las maschinas agraras da better neiv per ils plazs d'autos. Ei vegn anflau ch'omisduas variantas ein empau levas ed ins spetga aunc ulteriurs prospects per talas maschinas vid neiv.

Indignai essan dalla comunicaziun dil scamond da menar tratsch a Dieni per ulivar il terren che maunca pil plaz d'autos. Forsa daventa quei proximamein, suenter che Theophil Schmid ha giu amogna 2.- frs. per m³.

Gl'ei uras dad ira a radunonza da vischnaunca e tgi che va sabsenta.

Per fatg dil sura

Actuar Victor Berther

Sesiun el local Cadruvi, ils 28 da settember 1962

Presents: quater commembers, signur Benedetg Deflorin ei absents e perstgisaus. Ils protocols anteriurs, dils 21, 25 e 27 d.q. vegnan approvai cun la remarca ch'ils placats da propaganda seigien surdai en lavur da president e casier ensemen per ca 3500.- frs. Suenter che la radunonza da vischnaunca ha giu dau la concessiun per l'aua Cuolm – Val – Tegia Gronda, tenor damonda fatga, senza cundiziuns per 30 onns cuoz. Ella damonda fatga a scret ei menziunau, che nus laschien metter ella lingia 3 – 4 tocs, aschia che mintgin duei saver far diever dall'aua cun separticipar vid ils cuosts dil complex.

Sin fundament dalla offertas avon maun, stadas retratgas duront il studi dil project per far la canalisaziun, surdein las lavurs :

1° foss dalla lingia a Stiaffen Caduff e Vigeli Gger

2° tschaffadas e reservuar alla firma Murer

3° montascha dils bishels da plastic a Vigeli Hendry

Victor Berther vegn incaricaus d'orientar ils sorprendiders da da contrahar cun els ariguard prezis e lavur.

Entras in scriver sesxculpescha la firma Städeli per sia brev dils 12.9. e tarmetta tier ina mappa pleina da plans, ils quals il cassier surpren d'empalar vinavon tier Robert Decurtins.

Appartenent il tetg recumandaus da signur Bogner da far cun eternit, vegn dalla firma Städeli tuuttina recumandau da far en stuors sco stau concludiu pervia dalla furniziun.

Per conclusiun, discussiunond, tariffas e taxas, vegn fixau da, el decuors dalla jamna proxima, visitar semeglionts menaschis, forsa Arosa, Flem, Churwalden, per inagada saver prender conclus en caussa.

Actuar Victor Berther

Investa oculara Milez – Cuolm Val dils 5 d'october 1962 cun signur Städeli

Sin instant giavisch da signur Städeli a caschun da sia viseta, ha gl'actuar Victor Berther priu investa dil stadium da lavur dil runal. Quei di ein ils emprems masts vegni strubiai ensemen e otg eran sils posts agrad si tochen la sera.

Nus havein giu sentiment ch'il metter si ils masts mondi fetg spert e ch'ei drovi sperta lavur per che las staziuns primaras seigien finidas tochen che tuts ils masts stattan.

Sin fundament dall'investa haiel surpriu l'obligaziun da metter avon al cussegli d'administraziun ed orientar sur dil suandont.

1° la lingia electrica sut Milez sto naven immediat

2° Städeli damonda la cumpetenzza d'astgar disponer sez dil trasse, a caschun ch'el fa il transport da Putnengia a Milez cun la tocca greva, per in, eventual dus dis per disponer material alla staziun Milez ed eventualmein trasse.

3° Städeli ha dau sura da sin gliendisdis aunc encurir in tochen dus luvriers per el. El sincerescha da sez bonificar quels cun tutta spesa da segiradas etc. Quels dus duegien star tier siu stab 8 – 10 dis.

Il sura haiel communicau a scret a signur president Christian Berther ils 5 d'october 1962

Actuar Victor Berther

Radunonza dalla suprastonza dils 9 d'october 1962 a Rueras tier Brugger

Quasi nunspetgadamein giud la lavur vegn la suprastonza clamada tier ina radunonza.

Raschun ei la viseta dil biro fiduziar e da controlla Geiger.

Presents: Benedetg Deflorin, Theophil Schmid, Francestg Berther, Victor Berther, signur

Geiger + Sonder per biro.

Bendetg Deflorin vegn eligius president dil di ed ensemblamein tschentein si la gliesta da tractandas.

1. Prezis per abbonents runal
2. Reclamas e propaganda
3. Segiradas
4. Cudischaziuns e fatschenta
5. Aczias buca pagadas
6. Varia

Beneventond ils presents e fagend menziun da menar la radunonza per tudestg, surdat president dil di il plaid a signur Theophil Schmid per orientaziun.

1. Prezis per abbonents runal

Extendidamein orientescha Theophil Schmid sur dil success dalla viseta dil venderis vargau a Lantsch tier in semegliant menaschi. Quei signur hagi curtesevlamein orientau sur las tariffas e sin fundament da quellas ed en connex cun organs dall'uniun da cura e traffic en vischnaunca, sa el metter avon in sboz da taxas, tariffas e pusseivladads. Havend discussionau mintga varianta havein, fagend entginas midadas, fixau las suandontas tariffas e surdau al biro fiduziari Geiger l'incarica da surdar alla stampa, en bufatga fuorma, il program da tariffas. La limita da tariffa ei circa 35 rps per meter da differenza d'altezia. Perinamein ein ils presents d'accord da far duas tariffas fundamentalas, ina per indigens e la secunda per jasters :

- indigens ein tuts burgheis sesents en vischnaunca e domiciliai

- jasters ein hosps e burgheis egl jester

Resumau, indigens ein tut quels che pagan taglia en vischnaunca e han deponiu las scartiras en vischnaunca.

Las tariffas ein :

A. Carschi jasters singuls viadis	I. secziun	2.- frs	II. Secziun	4.- frs
Militer ed affons		1.- frs.		2.- frs.
B. Cartas da puncts				
10 puncts (mintga secziun 1 punct)	15% reducziun, jasters	18.- frs. / indigens	9.- frs.	
30 puncts	25%	44.- frs.	22.- frs.	
50 puncts	40%	60.- frs.	30.- frs.	
C. Cartas jamnilas		50.- frs.	25.- frs	
D. Cartas da sesiun cun foto		200.- frs.	100.- frs.	
Per affons da vischnaunca e domiciliai			40.- frs.	
E. Carta cun foto da combinaziun da sesiun				
Per runal Dieni-Milez-Cuolm Val e Valtgeva		240.- frs.	120.- frs.	
Affons			50.- frs.	

NB Nua ch'ei vegn menziunau nuot auter pagan ils affons 50% dallas taxas stipuladas per indigens.

Biro Geiger surpren da tschentar ensemen en ina bufatga fuorma e schar stampar cun metter tier era ils prezis dil runal Valtgeva, 5000 tocs.

2. Reclama

Signur Theophil Schmid, il qual ei staus incaricaus da far preparativas da reclama, sa comunicar che treis maletgs per Dieni seigien surdai ad ina firma a Turitg per 3500.- frs e per in clische da propaganda seigi dau sura a grafichers per in sboz, denton seigien era ils grafichers taxai dalla conjunctura.

Bien fussi denton da schar cumparer en la schurnalistica ina corrispondenza per orientar la publicitad dil stadium da baghegiar.

3. Segiradas

Per accidents da nos luvriers ei gl'entir menaschi segiraus tier la Suval per il prezi fundamental da 6000.- frs. Segirada encunter tiarzas persunas ei era en uorden.

Segirada da malsauns per nos luvriers, concludin da serrar cun cassa da malsauns Cadi. Sin fundament dallas offertas avon maun sedecidin per varianta A.

4. Cudischaziun

Signur Sonder e Geiger sclareschan giu co ei mass il meglier d'haver controlla dallas cassas sils differentes posts ed ei recamondan d'haver mintgina dallas secziuns in cassier, il qual siara giu quen di per di e surdat la cassa, forsa entras in commember dalla suprastanza, sin posta sin quen dalla banca. La banca dat lu vinavon las entradas al cassier principal. Firma Geiger surpren da menar en il cassier principal signur Schmid el sistem da contabilitad Ruf e vul per uonn arver ils cudischs ch'ei seigi fatg in'entschatta correcta.

Per la controlla sa la radunonza generala eleger aunc dus revisurs da quen.

5. Aczias aunc buca pagadas suenter repatidas visadas entras il biro Geiger eis ei treis aczias. Generalmein van ins d'accord da dar giu quellas aczias ad auters interessents cun informar ils annunziai.

Geiger metta avon musters da stampats per formulars d'aczias. Ei vegn concludiu da schar stampar formulars cun 12 coupons e scriver en sez il num digl acziunari. L'offerta dalla firma Maggi, Glion, ei 500.- frs. pauschal.

6. Varia

Sut varia vegn discussionau divers problems appartenet il persunal, cudischaziuns ed auters, denton priu negins conclus ed il president dil di signur Benedetg Deflorin siara la radunonza stada menada per tudestg, ord risguard da signur Geiger, engraziund per la lavur prestada entras mintga commember e gaiavsicha bien appetit pil gentar en retard, pertgei gl'ei prest las 13:30 e ha cuzzau treis uras.

Per fatg dil sura

Actuar Victor Berther

Sediun extraordinaria dils 11 d'october 1962

Ei era gia prest las 10 dalla sera, che signur president cloma per telefon tier ina sesiun ella Cruna.

Presents: Christian Berther e Victor Berther, Städeli senior e dus emploiai luvrers.

Raschun: Städeli senior ch'ei delegaus per il sorprendider Städeli per far las preparativas pil transport dil trax cun material grev a Milez, e per prender investa dallas lavurs da nivelar la lingia per saver cuntinuar ed occupar ses luvrers, fa da saver al president ch'el vegni damaun a prender siu stab da glied ed ira giu dil plaz, essend la lavur fatga dalla firma buca en uorden e basegni d'ina liunga correctura. Medemamein seigi il trax sco stau sentelgiu e secunvegniu buca sil plaz ed era hagi negin dau part auter, aschia ch'el seigi cheu danvons. El propona da schar metter la lingia en uorden entras in inschigner, havend la firma negin ch'ei el cass, sco ei para, da definir la lingia. Ils luvrers ch'ei vidlunder dall'entschatta e lavuran vid la montascha e masts per la firma Städeli, secundeschan il Städeli senior aschizun, ch'ei astgan dir, ch'ina lavur cun aschi bia e gronds sbagls hagian ei aunc mai viu e giu. Era seigi tier la firma negina cooperaziun e disciplina sil plaz da lavur.

Ditg e liung discussionein la presenta situaziun e ponderein il co e tgei far e prendein plaunsiu il suadont conclus.

Damaun ils 12 d'october, dueigi il peresident Chrsitian Berther, clamar gl'entir cussegl d'administraziun per in'orientaziun e viseta oculara sil plaz a Milez – Cuom Val e signur Städeli e siu capoluvrer han da sclarir giu sil plaz ed argumentar sias sura allegadas pretensiuns avon l'entira cumissiu e cussegl d'administraziun.

Ei era gia vargau l'ina ed uras da semetter a ruaus.

Per il sura, actuar Victor Berther

Viseta a Milez – Cuom Val, ils 12 d'october 1962

Il plaz da rimnada ei fixaus a Rueras sper fravia e Frars Berther, Rueras, ein empustai per menar ils presents a Milez. Presents tuts tschun commembers dil cussegl d'administraziun e signur Städeli senior. Avon che serender a Milez vegn priu investa dil protocol. S'entelli che signur Theophil Schmid, sco representant dalla firma, ha buca saviu approbar las renfatschas e dubis messas per protocol tenor vocalas expressiuns davart firma Städeli e ses luvrers.

Arrivai a Milez ei l'atmosfera ualti agitada ed ins va senza ceremonias vid l'inspeziun dils singuls postaments dils masts ch'ei construi tenor la lingia signada dad inschignier Canova all'entschatta dalla stad. Ins sa constatar ch'ils pichets signai cun ina guota ein tuts aunc avon maun. Cun nus vegnan a Milez treis capoluvrers dalla firma e dus luvrers dalla firma Städeli. Tut ils postaments vegnan miserai ed ins anfla e sa constatar che tuts da Milez ensi ein senza

excepziun tschentai digl ischel anora gest. La pli gronda varioanta e cira 5 – 8 mm. La lingia nova, entras la quala sulettamein treis dils masts fussen per uorden, ei tratga ier da signur Canova. Per punct decisiv per quella lingia ei il tgau dalla staziun finala. Che quei postament fuss menaus sillas varts haveva il capoluvrer gia constatau e dau part alla firma, la quala hagi approbau, menziunond che quei laschi curreger. Il sbagl, aschia sa il capoluvrer perschuerer ils persents, seigi d'attribuir sulettamein allas preits da betunar che seigien sin ina vart buca tratgas da cugn sco il plan pretenda ed aschia hagi ei mess la fatschada per circa 6 cm ord gl'ischel. Quellas aissas construidas a posta per betunar las staziuns finalas ein messas a disposiziun ed ein proproietad dalla firma Städeli. Plaunsiu laian era ils luvrers dalla firma Städeli perschuerer che quei seigi la raschun che la lingia midi direenziun ed ins descenda encunter Milez, ponderond las pusseivladads da megliurar e curreger. Aunc ditg vegn discussionau e finalmein fa Städeli senior la proposta da puntgar giu dil tgau dalla staziun sillas varts, ton che la lingia ei curregida aschia ch'ils postaments per ils masts ston buca vegnir midai ni stuschai. Theophil Schmid approbescha quella proposta cun la cundiziun che Städeli surprandi ils cuosts e che Canova constateschi cun Städeli junior, che la lavur fatga dalla firma Murer seigi en uorden. Dapli constateschan ils representants da Murer che firma Städeli drovi lenna ed uaffens senza aunc mai dumandar e che las renfatschas ch'ei hagian cementau en las schinas seigien buca fundadas, essend las schinas transportadas per ier sil plaz. Ch'il trax seigi buca sil plaz, hagi Städeli senior sez saviu constatar ier, havend el sez saviu telefonar alla firma Montalta a Glion e saviu perschuerer ch'il motor seigi defects. Era quella remarca fatga, ei en quei factum pia buca fundada e vegn refusada, havend Theophil Schmid pia fatg il pusseivel per survegnir il trax ad uras.

Nus tuts presents essan perschuerer che firma Murer ha luvrau tenor il plan e havein buca raschun da dubitar che la firma havess falliu enzanua enzatgei che havess consequenzas pil funcziunar dil runal. Sulettamein ha ei curdau si tier enqual postament ina schliata mischeida e ch'il tratsch e crappa sper masts ei bravamein rasaus ora. Denton ei l'ura da gentar e nus mein a casa.

p. f. Victor Berther

Protocol dils 12 d'october 1962

Presents tuts tschun commembers cun signur Robert Decurtins. Arvend e beneventond ils presents, fa signur president Christian Berther preleger ils protocols anteriurs. Il protocol dils 28 da settember ei approbaus senza remarclas. Sil protocol dils 5 d'october vegn fatg la remarca, che la firma Städeli duessi occupar en emprema lingia quels treis luvrers che nus havein pladiu e buca forsa quels luvrers ch'el ha fatg encurir per el, igl actuar tenor il protocol dils 5 d'october. En quei senn seigi da dar part a signur Städeli.

Ils protocols dils 9 ed 11 d'october ein caschun da pliras remarclas.

Christian Berther ha l'impressiun che las taxas seigien bassas. Theophil Schmid sa da dir, che las taxas seigien aunc alzadas dapi la conferenza cun organs dall'uniun da cura. Dapli sa Christian attestar ch'il protocol dalla sera dils 11 d'october seigi verbalmein screts exact sco ei seigi iu e seigi en uorden.

Signur Decurtins quenta, che sch'ins havess giu priu contact cun el, havessi il protocol saviu vegnir screts cun miez meins plaids. El fussi staus el cass da sclarir giu tut senza tala sensaziun, ed el conferescha sur sias visetas silla lavur, sias controllas e sias proposta entras las qualas Städeli seigi el cass da senz'auter ereger e curreger la lingia en uorden. El orientescha sur la lingia electrica a Milez e corrispundenza cun signur Büttiker. Appartenent il transport previus cun trax a Milez, seigi pusseivel da far cun jeep. Ed ins concluda da gia organisar damaun ils 13 d.q. quei transport. Robert Decurtins ha da mirar pils autos e carss da transport e Victor Berther avisar ils luvrers per gidar a far la carga. Per la staziun a val a Dieni procurescha la firma Murer per agen diever per in trax. Appartenent las remarclas el protocol, fatgas dalla cumissiun, appartenent schliata mischeida dil betun per postaments e diversas, lai signur Decurtins valer buc ina remarca. Tut seigi en uorden. Mo stoppi ussa la firma Murer ligiar giu ils postaments sin agen quen, perquei ch'ei hagian buca vibrau il betun tenor offerta.

Signur Theophil Schmid ei questa sera, havend tedlau attentamein il resultat dalla viseta oculara e dall'inspeziun a Milez, cuntents ed approbescha il protocol e desista da far opposiziun al protocol dalla sera dils 11 d'october.

La segirada Suval drovi ils 6000.- frs. tenor protocol anteriur buca per summa fundamentala, mobein per summa da taxaziun per las pagaglias.

Francestg Berther sa communicar che G. Fidel Cavegn preni bugen las aczias offeridas ed aunc il manco tochen 1000.- frs. ed ins vegn perina, che las empremas aczias che vegnan venalas, seigien da schar a signur Giachen Fidel Cavegn.

Signur Benedetg Deflorin less ch'era il cussegl d'administraziun fussi segiraus ed ei vegn dau sura a Francestg Berther da procurar per ina offerta.

Robert Decurtins havess bugen sche inschignier Canova prendess era el a Milez tier il nivelar la lingia. Era Städeli stuessi tier sias visetas visitar Decurtins, setschintschar ed orientar el. La firma Städeli hagi era falliu il pei d'in mast e quel seigi e selaschi rugalar.

Cu tut quellas remarclas, fatgas e naschidas entras la prelecziun dils protocols, ein stadas liquidadas, vegn entras Robert Decurtins presentau las offertas per las lavurs da lennari e stagner per ils baghetgs dallas staziun dil runal. Las remarclas fatgas sin diversas posiziuns, ariguard lavur da lennari e stagner, pertuccont prezis ed execuziun e maniera da lavur, vegnan da Decurtins buca approbadas ed ins surdat las lavurs da lennari: secziun I per 6599.- frs. a Deragisch Valentin; secziun II per 6998.- frs. a Frars Berther. Ils tetgs dils baghetgs a Beer Clau Antoni e fegls per total 4750.- frs. L'aua, quei ei la lingia en bischels da plastic dalla casa da giuvenils a Dieni tochen en nossa casa, ei medemamein surdau a fravi Beer e fegls. La damonda dils 29 da settember dalla VFA d'astgar ira atras cun l'aua ei aunc buca rispundida e Decurtins vul far attents quei il capo dalla viafier per telefon. Appartenent pupi da corrispondenza per la fatschenta runal, ei avon maun divers musters cun signets, ed ei vegn elegiu in tal presentaus dalla firma Maggi a Glion.

Actuar

Victor Berther

Sesiun cun Städeli ella Pensiun Badus a Rueras e Cruna Sedrun, ils 16 d'october 1962

Descendent il Cuolm Val, nua signur Städeli ha giu priu investa dalla situaziun avonmiezdi cun Theophil Schmid e suentermeizdi cun Canova entschiet a drizzar ils masts dall'emprema secziun da Milez engiu, ha el clamau signur Theophil Schmid, a caschun che lez era ual a Rueras e Victor Berther, per orientar el Badus a Rueras e da leu el hotel dalla Cruna per medemamein prender contact cun il president Christian Berther, il qual nus havein denton buca anflau.

El orientescha :

1. Damaun vegnan ses luvriers ed ei drezzan ils masts da Milez engiu, ils quals vegnan immediat culai en e cuntinuescha sil Cuolm.
2. La lingia electrica stuessi esser allontanada per astgar trer la suga. Pia mirar che quei daventi.
3. Sfurzar vinavon cun ils tetgs.
4. Constatescha e deplorescha el la differenza dalla jamna vargada ed el ei perschadius, fussi el sez staus presents, eri quei nuot. Theophil Schmid surpren d'orientar signur Büttiker dalla ORA appartenet la lingia electrica. Gl'auter dueigi Robert Decurtins, che ha enta maun il menaschi e che dueva sco s'entelgi medemamein esser a Milez cun Städeli, enstagl d'ira suentermiezdi a Cuera, mirar ch'ei mondi vinavon. Cun in viva sin sanadad dil giubilar Theophil Schmid dil miez tschentaner (50 onns da naschientscha) mein a casa.

Victor Berther

Radunonza dils 22 d'october 1962

Liug da radunonza: Hotel Cruna; presents tuts 5 commembers.

Essend differentas damondas da privats da Milez, en scret avon maun, per prender l'aua da nossa lingia a Milez per diever privat, concludin unanimamein, suenter liunga discussiun, da visar en scret tuts vischins ed interessents da Milez e convocar ina radunonza ed eventualmein discussionar la fundaziun d'ina corporaziun aquaduct ni las taxas da colligaziun.

Theophil Schmid metta avon duas variantas per placats da reclama ed orientescha sur dil contract cun in signur graficher Schmed da Cuera. Nus concludin da prender il placat en treis colurs e schar stampar 1000 tocs en grondezia 70x100 cm per 2250.- frs.

L'offerta per affischar sin petgas publicas vegn refusada e nus quintein saver plazzar ils placats sezs tier fatschentas ella Bassa, tenor iniziativa privata ellas vitrinas da fatschentas enconuschentas.

Dapli concludin da' inserar ellas treis gasettas grischunas duas ga per jamna duront ils meins december e schaner.

Inserats en ulteriuras gasettas dalla Bassa vegn schau sura a signur Theophil Schmid tenor agen maniar sch'ei fetschi basegns e tenor forza finaziuala.

Tenor in scriver dalla direcziun VFA dat ella part las cundiziuns sut las qualas ei lubeschan da sutcavar la lingia dall'aua a Putnengia. Ei vegn concludiu suenter entgina discussiun da dar part, che las cundiziuns tschentadas, seigien buca approbablas e nus seigien prompts da sorprender ina tiarza dils cuosts cun la viafier e Baseli Monn ni che nus refrin quella lavur per uonn.

Ils contracts per segirar nos luvriers encunter malsogna tier la cassa da malsauns Cadi ein avon maun e vegnan suttascrats.

Concludent avisa president Chrsitian Berther ina radunonza per mardis proxim allas 19.00 en local Cadruvi appartenent ils bigliets cun in signur jester.

Per fatg dil sura, actuar Victor Berther

Conferenza dil mardis, ils 30 d'october 1962 en Canossa ella Cruna

Gia allas siat la sera dils 30 essan tuts tschun commembers seradunai per seconferir cun signur Pidoux, representant dalla firma Gull + Scheibler, Basel, ariguard automats per bigliets e per ils bigleits tenor las taxaziuns e signur president beneventa quei signur e surdat immediat il plaid a signur Pidoux.

Quei signur muossa in apparat da dar ora bigliets fetg pratic e nus sedicedin da cumprar dus da quels automats per la staziun a Dieni e per Milez. Ils automats vegnan furni per sin ils 15 da schaner. Avon dat la firma dus apparats per gidar ora en in tec in'otra execuziun. Il prezi per garnitura ei 635.- frs. e gratis vitier dus blocs per rapports.

Igl empustar las rollas, respectiv cudischets da bigliets e cartas da sesiun e cumbinaziun, dat fetg bia da ponderar e calcular e signur Pidoux ei cun sia exprientscha gideivels da tschentar ensemen las variantas e simplificar la stampa e quantitad.

Bigliets ordinaris, cudischs da puncts, cudischets per bigliets jamnils cun foto, carta da identitad per bigliets da sesiun e per cumbinaziun, tut ensemen vegn sin in quen da rodund 1500.- frs.,. Denteren ein quater dils commembers s'absentai per gl'exercezi da cant, respectiv per presidiar ina radunonza dalla suprastonza electrica e signur Theophil Schmid ei restaus persuls cun signur Pidoux tochen suenter che treis commembers ein suenter cant puspei presents e selaian orientar sur la discussiun ed ei vegn, tochen che tut ei finiu, sco adina tochen l'ura da polizia e nus havein aunc caschun da tedlar la platta ch'annunzia l'ura avanzada.

Per fei dil sura

Victor Berther

Radunonza dils 8 da november 1962 el local Cadruvi

Presents president Christian Berther, Theophil Schmid, Benedetg Deflorin, Victor Berther e Robert Decurtins.

Ils protocols dils 12 d.q., dils 16, 28 e 30 d'october vegnan prelegi ed approbai senza remarcas. Benedetg Deflorin damonda, schebein la viafier hagi rispundiu il scriver e Christian Berther rispunda negativ.

Dapli fa Christian Berther enconuschent, ch'el vegni en cuort a visar radunonza ils vischins da Milez, per schar decider ils vischins, co separticipar digl aquaduct a Milez. Dapli sa el comunicar, ch'el hagi aunc dacuort priu investa dallas lavurs a Milez.

Robert Decurtins presenta las offertas per las lavurs da scrinaris vid las staziuns a Dieni e Milez. Las offertas vegnan pridas atras, mintga posiziun discussiunada e finalmein strihau diltut la posiziun¹¹ da far bauns da lavurs ellas staziuns, cun l'idea da metter il material a disposiziun e schar far nos luvriers la lavur. Ins concluda denton, da schar far barcuns per finiastras, per saver serrar via finiastras. Avon che surdar las lavurs tschentein da cuminonza ensemen ils cuosts fatgs ni lavurs surdadas e nus stuein seperschuader, ch'ei drova serestrenscher per ch'ils daners avon maun tonschien.

Las lavurs da scrinari vegnan surdadas: staziun I a Dieni als scrinaris Luis Cavegn e Placi Deragisch; la staziun II a Milez a scrinari Gion Antoni Giossi.

Architect Robert Decurtins vegn incaricaus da surdar las lavurs e cundiziunar ch'ellas stoppien esser finidas sigl 1. da december ni pagar 50.- frs. per di puniziun cunvenzionala. L'installaziun d'aua a Milez per dus WC vegn surdada ad installatur Vigeli Hendry da Sedrun e vegn giavischau da metter en closets cun lavaziun directa per scursanir ils cuosts. Il tschentar plattas en WC surdein a signur Leo Delgrosso per rodund 720.- frs. e signur architect Robert Decurtins ha era da surdar a quels sura lavurs.

President Christian Berther metta avon in'offerta dalla Winterthur-Unfall per segirar persunal dall'adminsitrasiun buca suttoposts alla segirada obligatoria d'accidents per la premia da 54.- frs. Entras conclus seresulvin d'acceptar quell'offerta.

Silsuenter discussionein aunc empau il problem dil persunal per Dieni, Milez e Valtgeva ed ins vegn perina da resalvar ina sesiun mo per ponderar e discussionar e prender conclus sur quella questiu.

Denton duei ins studiar e ponderar la situaziun ed haver endamen cun ins ni l'auters per seschar cussegljar, aschia ch'ins vegni tier in resultat cuntenteivel. Christian Berther, ch'ei oz il giubilar dil 52avel natalezi, siara la radunonza e pren encunter las gratulaziuns a casia. Per fatg dil sura, gl'actuar Victor Berther

Radunonza dils 2 da december, local Cadruvi

Presents tuts tschun commembers. Suenter cuort beinvegni, vegn prelegiu il protocol dils 8 da november e quel vegn cun engraziament approbaus.

President orientescha sur da sia lavur fatga en caussa corporaziun Milez. El hagi ussa cun Benedetg Valier rimnau tut ils vischins e persunavels da Milez, hagi denton aunc buca clamau ensemen la radunonza. Quei fetschi ussa, essend dau in tec neiv ed il temps avanzaus, buca prescha.

Dapli orientescha el, ch'el hagi suenter haver giu cuntact cugl actuar, schau ira enasi Milez luvrers, purs da Rueras, per schar far il pli necessari sut la suga en, tier omisduas secziuns e detg da pagar 3.- frs. per ura, inclusiv in viadi. Giusep Monn, ch'ha enta maun quels umens, hagi detg da dar sez la lenna, ch'ei duvrass eventualmein per far il trassé en loghens ch'ei va buca senza ina surfisa ed ulivada.

Entras in scriver dils 29 da november fa la firma Städeli attents la societad sin las munconzas trassé e snega tutta responsablada per cass d'accidents ed incaps.

Tuts presents acceptan las disposiziuns previdas dil president.

Per signalisaziun dallas lingias e mir, procurescha Victor Berther per ils pals, circa 50 – 80 tocs e cassier Theophil Schmid surpren da tschercar enzanua ils signals, sco reclamas da firmas ni semegliant ad autras medemas fatschentas.

Ualti ditg vegn discussionau las variantas per ina tegietta alla staziun finala al pei dil mast final sil Cuolm. Ins vegn unanimamein tier la conclusiu, ch'ina tegietta sco suddetg, seigi necessaria. Gl'actuar surpren la missiu d'immediatamein prender contact e surdar la lavur per ina sempla tegietta da circa 1 m² cun esch a Gion Antoni Giossi ni ad in auter scrinari ch'ha peda da far immediat quei suddetg.

Ditg e liung vegn discussionau dil persunal dil runal. Per metter vidlunder sis umens stabel en relaziuns pagadas meinsil, cun entscheiver cun paga meinsila cun igl emprem da schaner 1963, ein ins spert d'accord. Pli bia dat la repartiziun dils differents posts da studegiar. Nus previn provisoriamain tochen ils 31 da december la suandonta repartiziun per emprova. Nos treis pladi luvrers e Ludovic Monn, ch'era a sias uras era staus s'annunziaus e Pieder Deflorin, ch'ha la preferenza tenor contract da cumpra dil runal Valtgeva ed il qual nus previn sco schef da menaschi e cassier dil runal Valtgeva. Per Dieni e Milez duessen Luis Monn ed Ignazi Caduff surprender ils posts da responsablada e fuss d'orientar quels sur dallas obligaziuns e sur dalla responsablada ch'ei surprendan sco capos da mintga post.

Tumaisch Deflorin da Zarcuns, ch'ha gia fatg il cuors da skis e da sanitad, sorprendess eventualmein il post da schef per la pista ed en cass d'accidents gl'emprem agid e transport cun canadier. Per quel a disposiziun stuess aunc esser in ni dus umens adattai, buns skiunzs. Ins tschontscha da differents, Antieni Cavegn, da Giusep Monn, ni eventualmein da Rudolf Giossi. Quels vegnessen pagai tenor occupaziun, quintau che tals havessen pli u meins occupaziun mo denter perver e dis da bia traffic ni da bia neiv, stuessen quels aunc trer tier

agid supplementar.

La discussiun da metter sin cassa a Valtgeva ed a Dieni ina dunschala, resta senza conclus. Ei fuss denton, quei ein tuts d'accord, ina forza da lavur pli favoreivla ed ils umens vegnessen libers per auters posts necessaris.

Cassier Theophil Schmid metta avon las offertas dalla Basilea-Fiug per ina segirada encunter accidents dils mecanissem e sperdita d'entradas. La segirada da ruttadiras dil mecanissem importa 2376.- frs., per prevegnir sperditas d'entradas 1050.- frs. Tuts ein persquadi, ch'ins va en ina gronda resca da buca secuvierer entras segirada, denton vulan ins s'interessar dil fatg aunc tier autras segiradas ed instituziuns da quella specia.

Theophil Schmid fa seriusamein attents ch'ei fussi nunresponsabel da buca setener si vida quella segirada che cuvieri la resca.

Per conclusiun vegn concludiu da far calar ils miradurs cun ligiar giu fatschadas allas staziuns exponidas al freid.

Theophil Schmid vul aunc prender investa dil protocol dils 28 d'october appartenent ils inserats en gasettas, havend el gia entschiet cun inserats.

Per fatg dil sura

Victor Berther

Protocol dalla collaudiziun dil runal entras signur Kunz, ils 11 da december 1962

Entras visada per telefon da president Christian Berther, serimnan tuts tschun dall'administraziun runal alla staziun dil runal a Dieni per temps fixau, per leu vegnir ensemen cun signur Kunz, expert tecnic en fatgs runals. Signur Christian Berther beneventa signur Kunz ed orientescha sur las damondas administrativas che signur Kunz vul esser sclarius giu ed el ei aschilunsch cuntents cul sclariment. Appartenent vesta digl indrezs, fa el clar il program, giavischa il representant dalla firma Städeli, signur Bogner, gl'administratur dil runal, signur Theophil Schmid e serenda cun quels per runal a Milez e Cuolm Val per silsuenter dar orientaziun dallas imperssiuns alla cumissiun el restaurant dalla Posta a Rueras. Leu vegn fixau ina radunonza per suentermiezdi.

Nus auters restai anavos prendein investa dil baghetg dalla staziun a Dieni e dalla lavurs en ed entuorn il baghetg ed essan buca ual incantai fetg. Ei maunca escha e finiastras, maunca corpus cassa e glisch e scaldament. Bein ein ins en ed entuorn casa febrilmeln vid la lavur, vid il finir la lingia da menar naven l'aua, metter bishels da plastic, tschentar e cular plantschius ed auter pli. La neiv, il freid e la tiara schelada impedeschan speditiva e buna lavur, che sto denton tuttina vegnir terminada. Alla casa da giuvenils prendein nus investa dalla colligiaziun dall'aua e dalla lingia da cement. Cheu essan da differents meinis, ariguard il liug dallas sromaziuns. Las sligiaziuns e disposiziuns, denter signur Decurtins e commembers dall'administraziun, secuvieran buca. Denton eis ei miezdi e nus mein a gentar e seradunein suentermiezdi tenor giavisch ell'Ustria dalla Posta.

Leu ein presents alla conferenza puspei ils tschun commembers dall'administraziun, signur Kunz e signur Bogner. Signur Kunz orientescha dalla viseta tecnica e pren investa dallas polissas dallas segiradas e giavischa in supplement tier la segirada encunter tiarzas personas, aschia che la segirada annunziass al cantun scadina interrupziun. Appartenet parts tecnicas fa signur Kunz attents sin mancos e sin megliuraziuns e cumpletaziuns ed entscheiva cun l'emprema secziun Dieni-Milez.

1. El baghetg duei la peisa buca vegnir cuvretga cun plantschiu, pervia dalla controlla. El dat instrucziun sur dil pertgei e recamonda da serrar quei liug cun in tschabergagl.

2. Entochen che gl'entir indrez tecnic ei buca en uorden e luvraus en, duei buca vegnir carrau cun la tiarza spertadad, ch'ei resalvada mo en cass da gronda fuola.

3. Organs da runar astgi vegnir pendiu en emprema secziun 114 tocs, la secunda buca dapli che 88 tocs. Aschia pretendi il cantun.

4. Davon il carr cun gl'indrez maunchi dus lenn da schurmetg, ils quals vegnien montai proximamein, tenor orientaziun da signur Bogner.

5. Las instrucziuns tecnicas stoppien esser a scret e deponidas ellas staziuns ed il personal stuessi stediamein leger ed ademplir las directivas.

6. In cundrez d'alarm, per metter ord funcziun la maschinaria per cass da basegns, stuessi era vegnir baghegius en sils masts 5 e 8 – 10 tenor situaziun.

7. Signur Kunz recamonda ch'il personal mantegni e curregi la pista e hagi bien uorden en ed

enturn las staziuns. Ei seigi da metter a disposiziun material sanitaric per cass d'accidents, schinas per ruttadiras, faschas per fixar talas, persunal scolau e sliusas da spindrament.

8. Mintga staziun stuessi esser provedida cun in apparat da stizzar fiug.

9. Sinaquei ch'il cundrez d'empalar ella tiara forza electrica, che neschan entras defects electricis ni entras il cametg, sto la penda d'irom vegnir montada proximamein tenor ordinaziun e mintga staziun sto midar ora in rolli e mess en in tal senza gummi.

10. Ils luvriers stoppien sin las turas da controlla era serrar suenter strubas che sesligian entras la vibraziun.

11. Signur Kunz recamonda in telefon public alla staziun a val per differentes motivs.

Signur Kunz communicescha aunc tut quels gia indicai puncts a scret, surdat denton gia oz il runal al traffic e concludend gratulescha el alla societad dil runal. El hagi giu fetg buna impressiun dalla part tecnica furnida dalla firma Städeli ed imponius seigi el staus dalla biala survesta sil Cuolm e dil bi e spazius territori da skis.

Christian Berther engrazia a signur Kunz per sias breigias, per sia bunaveglia da dar liber al traffic il runal e per ses cumpliments viers territori ed indrezs e per ses cussegls ed avis. Nus hagian era en egl da segirar il traffic sur la lingia dalla viafier cun ils necessaris signals ed insumma prender stediamein contact cun ils emploiai luvriers, ch'ei tegnien en las ordinaziuns.

Medemamein a signur Bogner fa president Christian Berther in compliment per la renconuschientscha da signur Kunz appartenent cundrez tecnic ed engrazia alla firma Städeli per sias lavurs, breigias e cussegls ed il president envida en signur Bogner sco representant dalla firma da prender part d'ina tschavera d'avertura.

Concludend la sesiun communal ha il cussegl d'administraziun aunc spert liquidau in per caussas internas. Co e nua organisar ed envidar tier ina tschavera d'avertura vegn schau sura al president.

Dapli concludiu unanimamein d'arver il runal la sonda per ils affons gratuitamein e la dumengia proxima ils 16 da december ufficialmein e cun las medemas cundiziuns surdar il runal al traffic per jasters e dumiastis.

Signur Theophil Schmid surpren la puplicaziuns. Signur Benedetg Deflorin, duei tarmetter a Milez in electricist per far ventschidas. Per orientar il persunal ariguard tariffas, bigliets etc. surpren il cassier Theophil Schmid. Victor Berther duei aunc procurar per uorden da stuschar la neiv e per che la tegietta sil Cuolm vegni a liug tenor cussegl e giavisch da signur Kunz, orientar il scrinari Giossi.

Bunamein sco clamai, vegnan aunc il persunal tier nus e quels umens vegnan orientai dil curriu e passau e Christian Berther recamonda d'observar strictamein las ordras ariguard manipulaziuns tecnicas e survetsch vid pistas. Tuttavia il survetsch da biro da bigliets e dalla clientella d'abonnents vegn dau tutta breigia d'esser exacts e setener vid las instrucziuns. Ludovic Monn, che sto, essend che maschinist Pieder Deflorin sa buca surprender la posta a Valtgeva, era sin sonda metter en funcziun gliez runal, entscheiva gia damaun a Sedrun, per metter en funcziun e seschar scolar sur il runal sistem Garaventa. Per metter en uorden il runal a Dieni vegn schau ir enasi aunc Giusep Monn, Rudolf Giossi e Tumaisch Deflorin, ch'ei seigi tochen sonda gie tut en fuorma. Quels umens stattan a disposiziun per l'entira sesiun e san naturalmein sebrattar giu e vegnan clamai tenor basegns.

Perschuadi che la neiv nova, vegnida exactamein a dretg temps, hagi gronda cuolpa dalla bun'impressiun ch'il runal ha fatg e cun la ferma speranza ch'igl indrez funcziuneschi e cuntenti biara e bizara clientella, concludin la sesida ch'ha cuzzau en in liug ni l'auter l'entira schurnada, cun cuntentienstcha e spirontamein buns propiests e spir optimissem.

Viva, viva runal,
viva, viva persunal,
Dieus mantegni,
l'ovra e protegi.
Per fatg di sura
Victor Berther

Sesiun, ils 13 da december, Hotel Cruna

Presents: Christian Berther, Victor Berther, Theophil Schmid, signur Nutt e Theus per la

segirada Basilea-Fiug.

Sin fundament dall'offerta per accidents technics e per sminuaziun dallas entradas per cass da ruttadiras dalla maschinaria, orientescha signur Nutt liung e lad.

1. sur las pusseivladads da segirar,
2. sur las garanzias che la segiarda surpren,
3. sur la resca e sur dils avantatgs d'ina segirada.

El argumenta che 99% dils runals seigein segirai. Ina statistica muossa la necessitad. Senza segiarda da maschinas dat ei negina segirada per sperdita d'entradas.

4. El recamonda d'entrar ell'union da runals da skis. Nossa premia sereduceschi per rodond 400.- frs.

Ponderond e meditond exempels e statisticas e nunvulend surprender rescas personalas, havein, nunditgond las grondas expensas, empustau provisoricamein segirada da nies indrez e per sperdita d'entradas provisoricamein per sonda e dumengia proxima e cun la resalva dall'approbaziun dall'entira cumissiun e cussegl d'administraziun, da serrar giu las segiradas sco offeridas cun reducir las entradas sin 100'000.- frs. sin 700.- frs. premia

Gl'actuar

Victor Berther

Investa dallas preparativas per l'avertura a Dieni, ils 14 da december 1962

President, cassier ed actuar, han il venderdis suentermiezdi priu investa dallas preparativas per l'avertura dils 15 da december e disponiu sco suonda: Vegn dau ora negins bigliets. Tuts carschi pagan la sonda ina taxa minimala d'in franc per viadi, affons van gratuitamein sin atgna resca. Personal vegn disponiu tenor ina gliesta messa a scret e surdada al capo dalla staziun a Dieni.

Victor Berther vegn supplicaus d'envidar luvrers e mistergners da Rueras, ch'han luvrau vid runal, per dumengia proxima tier ina tschavera d'avertura el Hotel dalla Cruna a Sedrun.

Victor Berther

Benedicziun dil runal, isls 15 da december 1962

Presents alla benedicziun a Dieni ed a Milez ein Francestg Berther, Benedetg Deflorin e Victor Berther. Revendissim sur caplon Albin fa las ceremonias ecclesiasticas. Gl'ei aura criua, freida e cufla. Ils affons han, essend ils scoalsts a conferenza, buca saviu esser presents e mo pauca gliעד sa far diever digl avantatg da gratificaziun, muort la cuntinuada cufla. Era per la dumengia ei la prognosa buca megliera.

Victor Berther

Sesiun da s. Silvester en Canossa el Hotel Cruna

Presents tuts tschun commembers e tschun butteglas Riesling-Silvaner, sco biemaun dalla firma Städeli.

Ils protocols anteriurs, dapi ils 11 da december, vegnan prelegi ed approvai. Benedetg Deflorin lai orientar en caussa segiradas.

Ei vegn surviu ina platta, ina marena vengonza da tut laud e duront quella gustusa e savurusa marena, vegn discussionau e priu differents conclus.

1. Las bunamanas che crodan al personal, dueien udir mo al personal e repartidas ni duvradas denter il personal sco ei secunvegnan.
2. Scolas ni giuvens che gaudan instrucziun premilitara, che fan pista tenor instrucziun dil schef, san ira gratuit cun il runal, aschiditg sco ei fan lavur vid vial.
3. Ei seigi da visar signur Lezi Deflorin da Planatsch da buca schar ils bishels da plastic orasut la neiv en la psita.
4. Cumprau ina blusa per il cau dalla pista, aschia che tal vegni da tuts enconuschiu e medemamein marcar il personal ed ils commembers dil cussegl d'administraziun, co, duei signur Theophil Schmid encurir ina sligiazun.
5. Dueien ils caus dalla pista procurar che la valsa per far pista vegni sil plaz da lavur.

6. Signalisar il passadi sur la lingua cun in placat e prender ora in vial tenor basegns.

Medemamein suenter la lingua, nua ch'igl ei da schar liber pils organs dil runal; era quei procurescha signur Theophil Schmid.

7. En cass d'accidents, per metter ils disgraziats al stradun, vegn tschentau si las taxas sco suonda.

da Planatsch engiu 20.- frs.

da Milez engiu 40.- frs.

da Cuolm engiu 60.- frs.

Per tals skiturs senza segirada 50% pli pauc. En general ein ins medemamein prompts da dar giu material e persunal per accidents che succedan ord il rajun da nies runal. Il persunal denton, mo sch'ins sa senza resca dispensar.

8. Signur Benedetg Deflorin duei immediat procurar per quater sliusas da transport per blessai. Ils canadiers dall'uniun da cura e traffic, ch'han bunamein si monopol, san ins lura returnar.

9. Ei seigi da procurar per formulars screts avon per prender si las persunalias dil blessau.

10. Theophil Schmid duei immediat annunziar per in telefon public tier la direcziun e far tut pusseivel ch'ei vegni fatg schi spert sco pusseivel.

11. La firma Städeli duei immediat tarmetter ils organs da runar che mauncan.

12. Persunal dalla firma Städeli che van sil runal per far controlla, ni tals ch'han montau nies runal, dueien haver la preferenza d'ira gratuitamein, buca denton gl'entir persunal dalla firma Städeli.

13. Nies persunal ch'ha da prender giu ils dumbraders per la forza electrica tenor instrucziun, duei buca vegnir pagaus privatamein, mobein duei la societad che paga nies persunal far gl'incasso.

14. Ei duei vegnir fatg il contracts cun signur Baseli Monn, appartenent colligiaziun d'aua.

15. Ins ei generalmein dil meini d'indemnizar il persunal sco tochen ussa per uonn, cun pagar las uras. Ins discussionescha liung e lad quella questiun e finalmein vegn schau sura al cassier ed administratur Theophil Schmid da fixar pagas. Ils cau dalla pista, che fa dapli uras ch'ils gidonters, vegn automaticamein tier pli gronda pagaglia.

16. Signur Theophil Schmid orientescha sur dil menaschi e sa comunicar, che tochen ussa seigi pagau ora 78'700.- frs. e resti dil credit aunc 142'950.- frs. La banca hagi aunc garantiu in credit sil runal Valtgeva da 50'000.- frs. Las pagaglias dil persunal, pagadas ora tochen ils 15 da december, seigi 1643.- frs. Ord il menaschi seigi tochen oz pagau en silla banca 21'000.- frs., tut daners tratgs en ils davos diesch dis sur Nadal. Ins astgi esser optimists.

17. Empau discussiun dattan las differentas reclamaziuns appartenent taxas. Nus denton essan suenter haver discussionau quellas remarcsas, unanimamein dil meini ch'ins sappi repurtar quellas taxas ed essend nus commembers dall'uniun da runals, sappien ins schar dar giu in pareri neutral.

18. Appartenent il persunal, principlamein pertuccont ils cau dalla pista, sedat in ualti passiuada discussiun denter signur Benedetg Deflorin e Victor Berther. Nus havein denton l'impressiun che quella differenza seigi eliminada entras esser aviarts e dir il meini tenor perschuasiun.

19. Per prevegnir ad ulteriuras differenzas duei pli u meins mo in da nus tschun commembers haver il dretg da far attents sin mancos.

20. En quei senn vegn dau suar tutta lavur da menaschi a da controlla a signur Theophil Schmid sco cau.

21. Giavischond in a l'auter in bien niev onn e tut bien persunal, siara president Christian Berther la radunanza.

Per fatg dil sura

Gl'actuar Victor Berther

Sco finiziun

Cun la publicaziun dils protocols dalla Societad da runals digl onn 1962, hai jeu vuliu dar investa el process succedius el decuors digl onn da naschientscha dalla societad. Tut ei stau niev e perquei ha ei duvrau in process ed ils responsabels han giu nundetg lavur ed ein s'engaschai cun tutta energia per la realisaziun dil project che ha per propi dau l'entschatta dil turissem d'unviern ella val. Els merettan nossa admiraziun e san pil temps dad oz era

esser exempel. Jeu sperel ch'in ni l'auter hagi giu empau plascher da leger ils protocols, mintgaton stuiu sesmarvegliar ed enqualga forza piars in surrir.